

5214.7/7964-6-(22)

22



1780302

明詩紀事

貴陽陳田輯

目錄

黎民表 三十五首

民表字維敬從化人嘉靖甲午舉人除翰林院孔目
歷吏部司務制敕房中書南兵部員外改戶部進郎
中出為河南參議有瑤石山人稿十六卷

四庫總目民表詩雖錯采纓金而風骨典重無綺靡塗
飾之習

弇州山人稿瑤石五言古自建安而下及梁陳靡所
不出入近體風灑全盛遺響

詩藪詩之晚年彌工者黎惟敬歐楨伯皆嶺南巨擘
也惟敬近體深靚莊嚴類公實而老健過之
靜志居詩話瑤石詩讀之似質悶而實沈著堅韌元
美所取續五子無媿大小雅材者僅此一人而已

田按竹垞評瑤石詩似質悶而實沈著堅韌此第論
五古一體耳集中五律精深華妙七律風調流美五
絕清微淡遠嶺南當時詩家梁歐黎三人工力悉敵
公實質地較優而中道天折楨伯瑤石享中壽故成
就有不同耳

出郭十里望白雲山

伊余霞外心夙協滄洲想芳春戒簪朋青谿肅徂兩瀾瀾清
露溥英英白雲上旭日熹陽厓暄氣散林莽棧道旣縈紆窺
川亦沆瀣干呂氣多奇建木影殊狀陟雲胆已捐覽勝心逾
壯玄圃非冥設丹邱豈外象願矯凌風翼永恣山泉賞

登白雲最高頂

靈嶽奠南澳鳳翼矯而跣上千燭斗樞下盤絕地理修坂饒
蒂苓迴谿蔭榭梓東觀極扶桑西窺逼濛汜晨標頽霞截夜

氣白虹起玉樹發葱青金潭耿清泚平生信經奇茲山擅巨
美圖史謾莫傳倜儻固難紀儻驂飛龍遊長揖當途子

虞翻宅

城西有名刹云是仲翔園煙蘿日以翳堂隍無復存幽林集
異鳥曲沼羅芳蓀諫獵想奇節醉酒悼微愆懷瑜爾何罪捐
袂誠少恩才情豈不劭骨相故多屯瘴鄉有逆旅江介滯遊
魂抱獨縈遐感談經思偉言運銷名詎滅身屈道彌尊惟有
青蠅歎千秋傷隱淪

天甯寺

僧道衍故居

穹標干朱鳥崑嶺峙黃甸迢遞屢劫餘曠望千里見威神翊
棟宇丹梯凌棧齧隋荒戒不遠秦餘迹可踐宇內騁良圖異

人側延盼混迹漁樵流中備帷幄選叱咤興風雲指麾定京
縣豈徒人謀勝寔以覺力顯曩基有增飾故池仍重穿金骨
永不焚智燈夜猶炫弓劍歸鼎湖丹書閱淨院古瓦蒼鼠竄
寒林夕鳥嘯玄運有興衰浮生信露電迷川藉津航塵海孰
漂轉窮途創奇觀臨風淚如霰

登泰山作

神皋表東海作鎮何穹窿氣匠構萬有揮斤闢鴻濛頽然壓
九野奔伏如遊龍飛梯倚立壁側足臨絕淙靈飈生兩腋乃
造玉女宮仰視但蒼莽欲往階何從平生汗漫遊冷然感絕
蹤海日連周觀悲風起秦松息影止岩下搖心向忡忡

夏仲昭萬竿煙雨圖爲劉仲恭題

洋州墨竹曾傳譜東吳夏卿亦其伍常掃風枝及雨葉世人
往往傾貲取此幅離奇動萬竿煙嵐滅沒蛟龍蟠碧鮮下拂
彪池淺翠葆陰生洞壑寒天籟刁騷忽然起水意山情落斐
几窗前作賦戛金聲林下揮觴助立理煩襟俗狀借解紛始
知不可無此君寫真已足輕尺璧何況溪邊十畝雲願君寶
之勿輕擲城南僦舍勝泉石藉苔瀹茗時展觀洗予骯髒風
塵色

留都

伊昔風雲際誰依日月光鹿窮歸歷數龍變化侯王俎豆丹
青裏江山劍戟傍鉛刀思一騁流恨向宮牆

彈子磯

已錄卷五
三
茲嶺何綿互孤根下杳冥雲光盪鳥背水氣雜龍腥蜀道攢
爲閣廬山疊作屏定知人靜後風雨語精靈

香爐峽

重林遙蔽日羣峭上摩天蜃氣何齒翠猿聲更接連雙娥行
雨廟百丈上瀧船遠道應愁絕鄉園若箇邊

吳給事左遷同徐比部過訊

流言生白髮落羽自丹青一去甘微祿羣公在聖朝才名甯
燕雀身世且漁樵江上青楓遠客魂終易銷

嵩臺

景絕因江會樓高更得名山迴到海色樹殷落潮聲日影朱
旗直風含白氈輕憑欄聊引睇誰悉古今情

鐵泉菴

鐵壁臨千仞乘危更一探瀑前安茗竈松杪出花龕鶴憶窺
殘帙猿經伴夜談誰能開丈室招隱南山南

同肖甫夜宿龍華寺

曲水通龍沼荒塍次鹿園風塵湖外斷雲氣島中騫靜院鳥
雙下寒檠客對言誰知朝市裏叢桂得扳翻

舟泊金川望唐允治歐彥楨不至

嶺雲關樹思依依江上初逢秋月輝歧路無情還獨往青山
有約更同歸煙生古戍逢人少水落寒塘見雁稀楚客此時
頻悵望不知何處寄金徽

陳貴吾歐彥楨約遊玉鳥亭故址

弱水桑田更淺清
殘碑猶自記嘉平
青驪海上應無迹
玉鳥人間尙有名
笙管御風迴鶴夢
杉松將雨雜鸞聲
那堪采藥歸來晚
夜夜東風憶五城

春興次彥植韻

午夜鏘鏘簇佩鑾
金吾千隊警長安
欲求海客先祠竈
擬醮神君更築壇
丹桂影中迴日御
碧桃花下聳雲冠
侍臣聽罷鈞天曲
銀浦無聲沈濯寒

燕京書事

朱樓迢遞接平沙
歎息深聞有麗華
青鳥幾時隨阿母
綵鸞今夜屬良家
桃栽碧海多成實
桂貯長門自落花
寄語采桑南陌女
莫將顏色向人誇

登鎮海樓得憑字

歷盡丹梯第幾層
下臨千仞若無憑
石間細路縈紅葉
松頂寒花賸紫藤
遠目只隨芳草去
清歌長共碧雲凝
二山波浪空愁思
誰躡鴻鸞共上昇

經山人李子長墓

墳前烏雀啄高枝
過客能傳處士詩
食肉未爲何點累
解醒終笑季倫癡
荒山髣髴葬非違
俗流水浮名尙有碑
獨鶴不歸華表柱
麒麟高塚幾纍纍

東山別業爲梁少傅作

十里青山帶郭遙
風花三徑斷漁樵
衣冠韋曲名家後
詞賦淮南隱士招
對酒暝煙連竹墅
杖藜晴色過溪橋
登臨更有

羊何和詩興逢秋未寂寥

答張肖甫訊余卧病

落木寒砧不可聞山川蕭索夜平分故人顏色看明月倦客
心情在白雲滄海終懷鴻雁計赤霄新起鳳凰羣何人不奏
甘泉賦寂寞蓬蒿始見君

春日同許元復顧汝由兄弟遊白雲觀

萬行珠樹接丹邱白日曾傳駕彩虬鷄犬已隨金節去衣冠
不見翠華遊人間陵谷成千載劫外乾坤自十洲行客只貪
風景樂豈知芳草易生愁

柏伯以泰泉先生遊羅浮之作見示依韻寄上

曾事蓬萊洞裏仙風塵回首隔鈞天燒丹竈冷殘金薤洗藥

池荒長碧蓮潮水別來猶到海山庭歸去欲馳煙瑤臺東畔
茆廬在小住桃花五百年

戴金吾伯常招飲鄭園

禁城秋色淨無煙碧水澄波帶遠天十里樓臺通泰時五陵
花木有平泉風搖柳浪低紈扇日暮菱歌起釣船冰簟疏簾
銷暑地流塵知不到尊前

九日同李給事馮吳二侍御歐文學登城南樓

魚鱗重關鎮薊壤河山橫在赤闌前愁中白雁驚千里客邸
丹楓又六年立朔烽塵秋入塞紫垣宮闕上侵天淩雲更接
詞人賦不數蘭臺白雪篇

送李伯承還山

黃塵拂衣歸去來
酣歌擊筑相徘徊
青山似惜敬亭別
明月況有金陵杯
煙中柳條折欲盡
池上浮萍吹復開
楚江渺然挂席去
知爾萬里遊蓬萊

送張羽王移六安

與君南浦一相逢
聚散那知少定蹤
白首天涯猶謫宦
故人雲路幾登龍
心遙皖水城邊月
夢落浮槎寺裏鐘
莫歎賦才無客薦
長門誰是主恩濃

江行

袁郎清詠處
月夜遇征西
寂寞憐才意
空江鳥自啼

秋雨集清泉精舍

樓北控青山
是昔呼鸞道
金輿終不來
羅衣散秋草

列岫亭

會心不在多
一邱堪偃蹇
始笑武陵人
移住花源遠

竹在亭爲貞吉賦

齋閣夜蕭寥
風林散清影
天籟忽刁騷
幽人夢初醒

爲劉仲修題畫

長風送棹歌
得魚滿笊簪
若逢市朝人
道是江南景

宮詞 二首

金屋無人奉屬車
君王初誦上清書
日長不用教歌舞
白繞琪壇學步虛

未央樓殿敞秋風
芝火煌煌徹夜紅
知是驂鸞朝太乙
旌幢斜出五雲中

立殘銀漏未更衣聞道龍池駐翠駢衛士夜深傳畫燭御街
塵起六臣歸

王道行 一首

道行字明甫陽曲人嘉靖庚戌進士除鄧州知州歷
大名蘇州知府陝西參政河南按察使進四川布政
使有桂子園稿

大泌山房集龍池詩不雕刻以傷氣不敷衍以傷骨
摺拾博而師匠高

九月朔夜與友人飲南城樓

玉棟飛雲瀛太空銀河咫尺若爲通羣公環珮天風外萬疊
林巒煙雨中叢菊喜逢佳節近芳尊先與故人同祇今青海
無傳箭坐鎮深知鎖鑰功

石星 一首

星字拱辰東明人嘉靖乙未進士除行人進吏科給
事中坐言事杖爲民起原官遷尙寶司少卿歷大理
寺丞進少卿出爲南太僕寺卿擢左僉都御史協理
院事進左副都御史歷兵部侍郎進工部尙書加太
子少保改戶部兵部晉太子太保加少保以事下獄
論死

靜志居詩話少保雖與弇州聲應氣求然風雅道遠
弇州與陽曲王明甫齊進之續五子之列月旦如是
初不爲千秋起見止任一時之愛憎而已

同穆敬甫舟中

風雨蕭蕭野色昏故鄉歸去掩柴門殘春花鳥收詩卷大地

山河入酒尊抗疏匡衡歸計絀窮途阮籍壯心存相逢東道
如相問洛下猶餘數畝園

趙用賢 一首

用賢字汝師常熟人隆慶辛未進士選庶吉士除檢
討以建言杖為民起春坊贊善歷南國子監祭酒就
進禮部侍郎改北再改吏部卒贈禮部尚書諡文毅
有松石齋文集三十卷詩六卷

列朝詩集文毅彊學好問老而彌篤午夜攤書夾巨
燭窗戶洞然每至達旦為文章博達詳瞻少年頗警
警弇州晚而北面稱弟子弇州亦盛相推挹作續五
子詩及之而未五子居首焉

宿昭陵齋房呈溟南趙館丈

先皇原廟俯層陰肅穆祠官奉御心月露夜零千嶂曉風泉

寒咽九龍吟空傳遺舄留園寢猶想鳴珂直禁林繡草宣臺
何日事侍臣惟有淚沾襟

四日事... 貴陽陳田輯

明詩紀事

貴陽陳田輯



屠隆 十五首

隆字長卿鄞人萬歷丁丑進士除穎上知縣改青浦徵授禮部主事歷員外郎中有由拳集二十三卷曰

榆集二十卷栖真館集三十卷

弇州山人續稿長卿詩語秀逸有天造之致的然大歷以前人文尤瑰奇橫逸沈明臣豐對樓集長卿詩文宏肆鉅麗高華秀美燁然動人心目野獲篇今上甲申歲刑部主事俞顯卿論劾屠長卿得旨兩入俱革職為民俞松江上海人屠令青浦以事干謁屠不聽且加侮慢俞恨甚至具疏指屠淫縱有翠館侯門青樓郎署諸媠語上大怒並斥之時

西甯夫人有才色工音律屠亦能新聲頗以自炫每
 劇場輒闖入羣優中作技夫人從簾箔中見之勞以
 香茗因以外傳至於通家往往還亦有之何至如俞疏
 云云也近年屠於武林命其家童演此曲揮策四顧如
 謂一日遇屠於武林命其家童演此曲揮策四顧如
 辛幼安之歌江山千古自鳴得意於席間私問馮
 開之祭酒云屠年伯此記出於何典故馮笑曰子不
 知耶木字增一蓋成宋字清字與西為對泰即甯字
 之意也屠晚年自恨往時孟浪致累宋夫人被醜聲
 侯方嚮用亦因坐廢此懺悔文也
 列朝詩集長卿令青浦延接吳越間名士沈嘉則馮
 開之流泛舟置酒青簾白舫縱浪柳浦間以仙令
 自許在郎署益放詩酒中白簡罷官壯年不自聊縱
 遊關塞思得一當歸而談空覈玄自詭出世一無所
 遇為大言以自慰而已晚年出盱江登武夷窮八閩
 之勝阮堅之司理晉安以中秋大會詞人於烏石山
 之鄰香臺名士宴集者七十餘人而長卿為祭酒梨
 園數部觀者如堵酒闌樂罷長卿幅巾白衲奮袖作
 漁陽搯鼓聲一作廣場無人山雲怒飛海水起立林
 茂之少年下坐長卿起執其手曰子當為搥鼓歌以
 贈屠生快哉此夕千古矣長卿答友人書自敘其所
 作以為委敏而意疏姿敏故多疾給意疏故少精堅

束髮操觚睥睨一世長篇短什信心矢口嘗戲命兩
 人對案分拈二題各賦百韻咄嗟之間二章並就又
 與人對奕口誦詩文我誦彼書不逮誦非不欲求
 工厥物而姿性使然雖復苦心腐毫閣筆不下亦止
 如是長卿雖為吏家無餘費好交遊畜聲伎不耐岑
 寂不能不出遊人間自謂采真者十之三乞食者十
 之七蓋實錄也
 甬上耆舊集先生異才天縱橫視古今里中父老傳
 其飲中下筆杯影尚搖歌聲初轉一揮已滿四座盡
 傾其七言古詩意得處山奔海立斯亦一奇也余嘗
 謂錄古人詩要當於彼所意得使其獨擅者耳近人選長
 卿僅存一律復非其所意得使前人才氣於何得伸
 其未行世詩文名絳雪樓集尚數十卷藏於家
 明詩選陳卧子曰緯真詩如衝煩驛舍陳列壺觴頃
 刻辦就而少堪下箸
 靜志居詩話長卿才非不高而縱情奔放記云不知
 所以裁之者也
 田按長卿才氣縱橫長篇尤極恣肆惟任情傾瀉不
 自檢束未免瑜為瑕掩錄詩者但取寥寥短篇安足
 見所長李杲堂云錄詩非其意所得使前人才氣於
 何得伸最識文人苦心余於解大紳曾子啟屠長卿
 諸人均用此意使才鬼有知當拊舞地下

短歌

喬木多陰曠土多懷憂來無端西風鳴哀解一無登高臺以望

曠遠浮雲西馳白日何短解二晨登崑崙以臨具茨四海雖廣

不容須眉解三太行可升海水難測短褐行歌聲出金石解四

劉生

遊俠重三秦微軀可借人肯負將軍諾甯辭丞相嗔桃花嬌
寶騎芳草映文裯不向沙場上誰知百戰身

荆卿歌

荆卿薄舞陽七首挾秋霜殺氣衝寒日悲風下大荒繡柱猶
堪遶金屏不可防燕魂飲恨沒秦草逐年芳

吁嗟行為馮開之賦

吁嗟馮先生汝為我飲我為汝謳仰天大嘯銷百憂星辰北
走河漢西流昨日北風叫枯桑今朝芳樹鳴鴉鳩世事如此
今我何求我欲努力取富貴富貴難自適我欲局促修空名
空名竟何益丈夫低眉復苦心笑殺金華紫煙客夜來聞君
浩蕩言使我酒量大如斗堯舜桀紂總枯骨不如月下一杯
酒紅燭未殘歌聲漸低酒中累月堪沈迷空林不問城烏曉
吁嗟馮先生眼前落落君與我百年一日且瀟灑好風吹花
花欲言與君爛醉筮篲下酒罷登臚思黯然絳桃遙指西湖
邊今朝送君出門去明朝世事還相煎相煎何為快意當前
中酒迷花虛白日萬山千水隔蒼煙

劉御史歌

丞相怒烈士皮驄馬來烈士災陰風蕭蕭神靈哭不止黃沙
 荒荒烈士死吁嗟乎劉御史遼陽天黑白日沒下有猓猱上
 有鵠磨牙鑿齒據其窟山鬼不敢弔河伯不敢出妻子那及
 收骸骨嗚呼噫嘻何人殺孔融何人殺臧洪男兒出身報天
 子俛首屈死蓬蒿中雲旗獵獵紅滿空天兵下來衝煙虹將
 軍十道開寶弓誰當迎御史上帝特遣關龍逢關龍逢握公
 手釀天河挹北斗拂公塵埃飲公酒人間嶮巖天上否遊戲
 白玉堂逍遙黃金牖椒山青霞亦公友自公去矣廓氛霾天
 清地朗日月開墓前銅雀化為灰塞上金雞謫戍回公不在
 矣使心哀我哀何為公不答仰視高空寒颼颼白雲蒼茫九
 關合乾坤轂轉人事還天子下詔褒忠賢鬼蜮射人虹霓障

天殲我烈士古路邊榮以大官寵大篇子孫仍賜綿上田蕙
 穀桂醴焚紙錢年年寒食墓門煙

田按劉御史安福劉臺也萬歷初巡按遼東坐誤奏
 捷奉旨譙責旋上疏劾輔臣張居正疏載明史本傳
 中語甚切直居正怒廷辨之曰在令巡按不得報軍
 功遼東大捷臺違制妄奏法應降謫臣第請旨戒諭
 臺發憤於臣且臺為臣所取士二百年來無門生劾
 師長者計惟一且臺為臣所取士二百年來無門生劾
 御座手掖之慰留再三居正強諾不出視事帝遣司
 禮太監孫隆齎手敕宣諭乃起遂捕臺至京師下詔
 獄命廷杖百遠戍居正陽具疏救乃除名為民居正
 恨不已臺按遼時與巡撫張學顏不相得至是學顏
 入為戶部誣臺私贖銀居正屬御史于應昌巡遼覈
 之而合王宗載巡撫江廣西廉臺里中事二人希居正
 意實其事以聞遂戍臺廣西臺至潯州飲戍主所歸
 而暴卒是日居正亦卒御史江東之訟臺冤劾宗載
 應昌南京御史孫繼先亦發學顏陷臺罪帝方嚮學
 顏得不問已而江西遼東巡撫除名贈臺光祿少卿廕
 一子天啟初追諡毅思

卓徵甫光祿張具大會汪伯玉司馬諸名賢西湖南屏

山分體得隄字

天空秋氣高雲盡虛堂做山川既以嘉風日亦以朗賢豪大
會傾東南瓊筵飛蓋邀清賞松蘿偃戶路欲迷水風度曲聲
轉低可憐楊柳尙垂地正及芙蓉開滿隄酒酣杖策捫高嶺
縱有涼颯扶不醒座擁金釵十二行湖吹雪浪三千頃紈扇
盈盈隔絳紗美人一一芙蓉花好取清歌留落日更將秀色
比明霞諸公競起尋詩去嘯入蒼煙不知處興到甯辭琥珀
杯詩成盡託珊瑚樹吁嗟乎蘭亭寂寞哀諸賢千秋風雅今
寂然此會名追王謝後只疑身在永和年

神鉤篇贈李子年

吳人鑄劍天下無二子精靈時可呼雷鳴電擊勢飛動夜深
妖血猶模糊水犀十萬壓羅刹光閃吳鉤白如雪提攜在手
鬼夜愁橫行東南摧越絕仰挾浮雲六合昏俯斫海水蛟龍
奔李生才氣有如此無乃古鐵之精魂君不見荆卿匕首往
不回終作秦王柱下灰子房偃蹇遇黃石滅楚興劉起三尺
古來英雄真不同意氣橫空貫白虹

孤憤篇

城南蕭蕭行人斷野風吹沙白草短狐狸穿土鬼嘯霜天陰
夜夜青燐滿義士一邱託山阿何人殺之鷹與犬姦雄灰滅
乃天亡鷹邪犬邪投煙荒君魂蕭穆靈旗張我來灑泣酌椒
漿地下同遊陳少陽

田按長卿孤憤篇自序為宛陵吳君仕期作也仕期
為諸生值負氣有古烈丈夫風萬歷中進士鄒元
標疏論江陵奪情被廷杖謫戍都勻過京口仕期聞
而疏論百里及之江上握手慨泣數行下歸而作
書萬言抵江陵數其罪遣奴如京師為有力者匿不
得達後江陵微知其事大恨無何蕪湖黠諸生王律
者私草一疏託名海瑞而偽撰廷旨有所處分事聞
之南都操江都御史胡欖欖楚人江陵黨也陰屬大
平府同知龍宗武廉其狀宗武希江陵旨窮治王律
知仕期有上書事遂嗾王律謂疏出仕期手律不肯
宗武虐考之乃妄承密以聞欖及江陵江陵報書必
殺乃已宗武以計給仕期至太平嚴訊且謂仕期日
爾郡中薦紳有得罪時相者染之則汝罪寬矣仕期
恍慨曰我自陳其冤狀不得奈何復轉為他人寬男
兒死則死不能枉害忠良宗武所指蓋宣城沈君典
亦江陵所恨也宗武乃下仕期獄絕糧數日仕期餓
嚙其衣絮殆盡不死以沙囊壓其口殺之江陵死南
都御史孫維城疏訟仕期冤有旨逮宗武及欖鞠治
並坐永戍余謂江陵相業功在社稷獨其以匪賊殺
人可為痛恨厥後詔沒其家先期錄人口錮其門子
女避空室中餓死者十餘輩天道好還諒哉

送龍君超

念子客應久况茲秋復深向來多道氣到處復雲林謝客巖
猶在豐干寺可尋河梁無限意絡緯助悲吟

冬日同韓承志管登之錢功父吳元卿過開元寺訪湛

公

禪房暮蕭瑟斜日挂霜藤渡海前朝佛彌天大智僧譚應花
雨落坐訝塔雲崩師是西來者行傳幾代燈

蘇小小墓

日落西陵冷暮潮美人南國恨蕭條江邊草綠青驄去墓上
花開紅粉銷明月可能留寶曆垂楊猶自學纖腰白門亦有
嗚鳥在多少香魂不可招

吳太史舊宅

太史風流不可論
山邱華屋祇銷魂
淒涼野老談歌舞
寂寞鄰家寄子孫
誰遣空階生綠草
曾經明月照朱門
傷心回首十年事
流水殘霞遶舊村

寄張白甫司馬

真人黃石佐兵機
淮蔡功成好拂衣
刁斗長離飲馬窟
絲綸初穩釣魚磯
雨香錦水攀花入
雲冷青城採藥歸
聞道銅梁開別業
日斜誰與望清暉

寄答唐嗣宗

一院梧陰月正鮮
好風吹墮彩雲篇
已知都水持僧律
猶爲淵明寄酒錢
入夜蟲聲喧草露
懷人秋色到湖煙
相逢莫落

芙蓉後白苾青樽客滿船

寄蕭以占太史時校士越中書來訂西湖之約不赴

向來詞賦借山川
才子胸中五色煙
雲夢綵毫吞八九
錢唐強弩射三千
鳥飛葭葦天如鏡
客倚芙蓉秋滿船
定踏西冷橋畔月
一杯何處喚逋仙

胡應麟

四首

應麟字元瑞蘭谿人萬曆丙子舉人有少室山房類

橐一百二十卷

四庫總目應麟雖仰承七子餘派而記誦淹通實在隆

萬諸家上故所作燕雜之內尚具菁華

弇州山人續稿元瑞詩才高而氣雄鴻臚明儻橫絕

無前稍假以年將與日而化矣

王奉常集元瑞詩卓詭宏麗奔詣秀出

野獲篇胡元瑞好使酒一日寓西湖適汪太函司馬

野獲篇胡元瑞好使酒一日寓西湖適汪太函司馬

攜乃弟仲淹來杭王元美伯仲並東南諸名士大會
於湖中仲淹已病其詩頗有深思秀句心薄胡之粗
豪忽傲起謂元美曰公奈何遠以詩統傳元瑞此等
得登壇姑將置吾輩何地汪王三先生出倉猝不及
答元瑞亦識仲淹氣盛第怒目視時威元敬少保實
借二汪渡江同席飲出輒語兩解之胡大怒移罵至
日為粗人戚驚避促與度嶺去滿座不歡而罷
明詩選陳臥子曰元瑞如中賈張肆不皆珍異却無
物不有又如老樂工清濁輕重都傳弟子
靜志居詩話長律至百韻已為繁富矣元美哭于鱗
乃增益至一百二十元瑞哭元美則更倍之蓋感知
己之深不禁長言之也詩藪一篇專以羽翼后言虞
山錢氏詬之太甚觀少室山房筆叢沈酣四部自不
失為讀書種子詎可因詩藪而概斥之乎
琴書元瑞之重以弇州歿入白榆社白榆者汪
司馬社也司馬歿諸詞客裹糧入發者踵相接莫敢
異同
田按元瑞嗜書購四萬餘卷築室貯之黎惟敬大書
其楣曰二酉山房屬王元美為記元瑞著詩藪附和
卮言元美大激賞之許傳詩統謂後我而作者其在
此子矣詩品在末五子中可與屠長卿伯仲

破山寺老衲夜談作

一徑入蒼翠飛雲裊裊屯危亭標木末古剎翳松根海月時

窺牖山風日埽門憑呼野衲至信宿共芳尊

題唐山人蓮葉舟

有序

蓮葉舟輕自學操唐人句也山人輕船湖上悉屏長

年青笠綠蓑悠然獨往

芙蓉花發大隄前六尺沙棠任晏眠南楚舊聞唐勒賦西冷

重觀白公船吹簫極浦凌風去把釣前灘抱月還三十六陂

新水漲行吟何處不堪憐

石城曲

踏青無限好江頭二三月恨殺潯陽風吹郎上三峽

送徐茂才

竹窗螢火記當年心折蘭陵繫酒船今日相逢猶有恨西風
憔悴菊花前

魏允中

六首

允中字懋權南樂人萬曆庚辰進士除太常博士遷

吏部主事有仲子集八卷

弇州山人續稿仲子於詩無所不工五七言律尤其
至者大較情真而語道意高而調協不欲以江左之
浮藻掩河朔之風骨
列朝詩集懋權為諸生王元美以兵使行部贈之詩
曰還將代興意對酒頌如澠丙子秋試元美偕同官
飲於使院戒關吏曰小錄至非魏允中第一無伐鼓
以傳也抵暮鼓發相與譴叫絕倒其賞異如此
田按懋權五律疏爽七律調高尚多浮響

周生歸黃州

涼風吹客帆落日過湖南握手空相送離心不可堪片雲縈

楚岫一葉下江潭何地偏相憶朱家酒夜酣

重陽前日

落葉夜如雨長安寒氣催明朝又重九何處臨高臺白雁成
行去黃花市徑開天涯有兄弟墮淚滿金杯

王憲臬宰太湖

湖上太湖城湖光一鏡平漁人堂下宿鷗鳥案邊行問俗時
乘棹臨流日濯纓使君清似水不獨太湖清

秋日同趙夢白顧叔時姜養沖劉厚吾靜修皎如二上人遊蓮花池

人遊蓮花池

北闕嗟猶戀東山歸未能朝回頻整駕人外一尋僧花意含

秋澹波光向晚澄怪來留竟日茲興本難乘

送康裕卿寄暘谷先生

授簡風流滿洛陽青春遊子倦還鄉桃花尚記當年宅荷葉
堪為卒歲裳九曲暮雲連雁宕片帆秋雨落錢塘吳門驄馬
深相憶錦字遙憑寄幾行

送黎員外還京時有祕書之徵

太行春盡促征旄河朔槎迴北斗高白髮主恩仍浩蕩青雲
客計未蕭騷春風委珮朝丹闕曉日觚棱侍彩毫迴首鳳池
應萬里思君惟有夢魂勞

李維楨二首

維楨字本甯京山人隆慶戊辰進士選庶吉士授編

修進修撰出為陝西參議進提學副使累遷布政使

擢南太僕卿改太常卿未赴召拜南禮部侍郎進尚

書贈太子少保有大泌山房集一百三十四卷

列朝詩集本甯洪裁豔詞援筆揮灑又能散轍曲隨
以屬厥求者之意其詩文聲價騰涌而品格漸下
靜志居詩話本甯如官廚宿饌麕鹿肥麋雖腥膻具
陳蠹藁雜進而無當於味
田按本甯詩選詞徵典不善持擇多陳因之言而披
沙採金時復遇寶

銀州

前旌時隱見石壁轉縈迴流水寒城咽孤鴻遠戍哀山盤光
祿塞雲鎮赫連臺忽爾風沙合驂驪萬馬來

題畫

隋苑螺橫山黛吳門練曳溪紋石橋慘徑紅雨草閣鈎簾白

雲

吳旦 十六首

旦字而待南海人嘉靖丁酉舉人官歸州知州有蘭

皋集

陳文藻南園後五先生集而待師事黃泰泉與歐大任黎民表梁有譽結社南園世稱南園後五先生之

田按而待詩才藻俊麗惜集不傳陳文藻輯五先生詩蘭皋僅錄十餘首余從郭棐嶺海名勝記獲詩五篇亟登之以補其缺

玉峽夜泊聞歌吹聲

江潭月欲上汀州露未重趙女歌正揚越客魂先動玉柱應
離鸞瑤笙學調鳳窈窕子夜聲悽惻江南弄繁音逐水流哀
響因風送曲罷夜蒼蒼踟躕人如夢

月溪

玉洞竄無門珠簾不可捲梯峯陟窮嶺刻石臻遙峴蹊參灌
木入行並修篁轉禪界稍歇堙靈泉猶清淺花凋龍女臺草
積象王輦二梵行當已三車誰能演藉草停曠蹤柳絮豁英
晒翠涵岫類滴雲抹林疑翦感蓮心所懷浩歌興粗遣

鶴舒臺是安期上昇處

蓄賞自玄古飄飄臨紫清流霞帶方島絳雪曜層城飛仙杳
難冀高臺空復情煙開樹痕碧日湛水華明歲蕤望蜺蓋參
差聞鳳笙馳齡苟可駐榻來遵遐征

翠峯草堂

對君何處問迢遞草堂深獨坐冥塵慮微吟生隱心孤峯留

晚照平野帶秋陰庭下栽松樹蒼蒼已滿林

海珠遊覽

地控鯨人室天回象帝宮寶花紛映水香閣迴臨空刹影江
鴻觸鐘聲海霧籠戒珠長不滅靈景夜昭融

遊小金山

碧水流無極蒼山望不窮寶花飄象駕珠樹繞龍宮二梵何
年續三車此地雄心猿坐來絆知在慧門中

曹溪觀盪水石還遇滄師邀酌

山路少蹊徑行吟隨所之偶然閒坐處便是會心時石墜分
泉口雲過挂樹枝野僧邀共酌不覺忘還期

劉仙巖

裏鳥去何勤靈蹤在白雲穿林樵徑逗過壠石泉分古溜空
青色孤根剝玉紋嵐霏行處薄花氣坐來薰谷靜聲相答天
低語可聞怪猿垂木末高鳥出人羣未究丹光蹟誰探綠字
文寄書招隱士此地絕塵氛

峽山寺

招提幽絕處千壑捧珠宮山勢懸疑墜川流曲似窮黃鍾仙
管寂碧玉妙環空忍草棲靈霧曇花落慧風竈殘泥尙溼丹
化井猶通夙昔登臨地題詩憶遠公

姑蘇道中

川途紆曲有餘清水國湖田曳槳行震澤蒹葭雲外委洞庭
包橋望中明煙波尙載扁舟影露葉虛傳響屨聲唯有舊時

春草色年年生遶闔閭城

匡門弔古 二首

羌管胡琴一曲歌南人漸少北人多空聞杞女齊城哭不見
昭王漢水過寶册有靈浮海島珠襦無主寄煙蘿千年留得
孤忠在成敗休論奈爾何

誤國由來一字閒上方無劍討神姦虞淵日入誰能取滄海
龍遊遂不還夜後蜀禽猶迸血秋來湘竹總成斑丹青俎豆
休明事一簇崇祠幾仞山

九成臺

碧玉闌干壓故基虞皇曾此駐旌旌風篁尚帶絃琴曲谷鳥
猶呈羽鳳儀二女不來雲黯黯重華何處草離離郡城北望

山如戟落日微茫似九疑

宜谷宿南華寺

滿天涼露淨微颺向夜疎簾手自披明月故人千里共白雲
禪室九秋期齋鐘乍動唳猿續塔火初燃落雁知一與遠公
談諦義欲投蓮舍戀眞師

一檢貴幸篇

常陪車駕幸甘泉少小偏承漢主憐日暮羽林傳警蹕花驄

嘶過禁輿前

文衡山山水畫

路入雲林一徑斜紅塵飛斷卽煙霞江南小隱無多地楊柳
陰中只數家

劍中李時行

四首

詔人雲時行字少偕番禺人嘉靖辛丑進士除嘉興知縣徵授南兵部主事有青霞前後集

田按南園後五子青霞差弱

巖居僧

一鉢寄岩石塵喧迴不聞小廚分澗水短榻卧松雲衣借枯藤補香收野蕝焚晚來趺坐處猿鶴自爲羣

不出幾經旬幽栖廢櫛巾鳥嘯方覺曙花發始知春懶性豈宜俗浮名空累身祇便來客少麋鹿自相親

山歌夏日同姚子玉費子文遊雲居寺

蒼煙白石滿空山野寺深藏亂竹間遊客漫隨清磬入老僧長對落花閒潭邊宿雨從龍去樹底殘雲伴鶴還盡日臨流恣幽賞披襟坐遍石苔斑

寄劉珠江陳中閣黎瑤石

莫向塵氛歎路歧百年心事故人知感時潘岳愁雙鬢出塞梁鴻賦五噫洲渚月明朝落早蒹葭霜冷雁來遲悲笳近報邊聲急鄉國東歸未可期

藝苑冠言吾弟世懋自難服除後一操觚遂爾靈

異神造之句憑陵作者唯未為古樂府耳其皆具

體而微吾偶遣信問于鱗漫及之日家弟軼塵而奔

咄咄來逼人賴其好飲稍自寬耳于鱗亦云敬美視

助甫輩自先驅視元美雁行也嘗取謝句花萼嬰鳴

標君家兄弟不然耶又一書云敬美乃負包宗含吳

之志稱天下事未可量耽耽欲作江南一小英雄尋

將火攻伯仁奈何不善備之也其見賞如此

明詩紀事

貴陽陳田輯

已籤

王世懋 十二首

世懋字敬美太倉州人尚書世貞弟嘉靖己未進士

除南禮部主事遷尚寶寺丞出為江西參議遷陝西

副使改福建遷南太常少卿有奉常集六十九卷

藝苑冠言吾弟世懋自難服除後一操觚遂爾靈異神造之句憑陵作者唯未為古樂府耳其皆具體而微吾偶遣信問于鱗漫及之日家弟軼塵而奔咄咄來逼人賴其好飲稍自寬耳于鱗亦云敬美視助甫輩自先驅視元美雁行也嘗取謝句花萼嬰鳴標君家兄弟不然耶又一書云敬美乃負包宗含吳之志稱天下事未可量耽耽欲作江南一小英雄尋將火攻伯仁奈何不善備之也其見賞如此

詩數敬美古詩歌行勁逸道爽宗吳李謝方之茂如
以配哲昆誠無愧色五言律旨趣時屬右丞七言律

馮元成選集王次公之詩關中集尤佳

閣書汀州南山限有霹靂巖宋元祐間白晝迅雷一

聲劃開巖洞中有丹竈丹井其旁一石名烏鼻石明

嘉靖中徐中行子與為汀守宗臣子相以臬師行郡

相與飲酒賦詩此中傳為佳蹟王世懋詩云選地偏

多物外情捫碑忽著故人名千秋霹靂開丹竈四面

芙蓉出化城

明詩選李舒章云奉常詩如烏衣羣少粗有風格不

足對揚父兄

列朝詩集敬美論本朝之詩獨推徐昌穀高于業二

家以為更千百何尚廢興徐高必無絕響其

微詞諷寄雅不欲奉歷下壇坫則其於大美亦可知

也

靜志居詩話敬美才雖不逮詰昆習氣猶未陷溺

田按敬美早年呈于鱗詩云王生落落天地間自言

得御李君還從他百道吳門色我自銜杯望泰山又

讀元美于鱗詩云余朝夕珠玉左右仲宣把卷

沈翫浸入心脾故其所作不離二君窠曰晚作藝圃

擷餘始云海內為詩者爭事剽竊于鱗紛紛刻鷺至

使人厭又有李向尚有廢興徐高必無絕響之論可謂妙悟惜其才非殊絕不足以副其言耳

同俞仲蔚家兄元美登馬鞍山飲

陽鳥下山岑暖暖川上没沙崩石岸出雨積松徑滑疏林時

映帶遠塔乍明滅興盡宵中還春燈亂明月

夜泊芙蓉湖翫月效韋體

今宵仲冬月忽發滄洲興進艇延素光開樽坐清鏡霜含煙

樹遠塔挂寒山靜何處洞簫聲魚龍夜深聽

題沈敬甫春山欲雨圖

春光噴薄橫塘渡峯巒吳山不知數誰將片黑著峯頭吹作

氤氳萬山暮擁樹猶疑隔嶺煙飛花忽斷前溪路胥口行人

畏若濡隴頭新麥思如澍此時元氣何淋漓欲雨不雨天為

疑兩儀坐失玄黃色萬壑爭流蒼翠姿樓臺虛入蛟蜃散屏
嶂倒列芙蓉垂不知雨後更何態最好春山是此時何人此
意成真賞百年盤礴其人往陽春煙景留尺素真宰蒼茫墮
雙掌鞭龍驅石事有無胡然令我心神爽鉛華刊盡但墨汁
出匣看雲把猶溼雨師作使不得休山鬼蘿深夜中泣眉黛
含鑿鎖不開更如神女怨陽臺莫愁筆底風流盡春半吳江
棹裡來

命州山人稿石田畫卷無過春山欲雨圖其源出巨
然而加以秀潤不作驚風怒霆勃然若玉環醉西
氣在含吐間峯巒出沒草樹滃鬱類然若玉環醉西
涼葡萄後將賜溫泉沐者卷距今垂百年每一展覽
覺風格若生墨瀋猶溼真神品也夏日九宜堂與沈
山人嘉則舍弟敬美曹甥子念相約為此歌雖咄咄
賞新語猶自後塵

秋日虎邱同家兄過松墟上人房

叢林日初午飯罷行禪關問道欲無語逢人殊更閒支頤過
花雨跌坐空秋山回首向來地雲深不可攀

沈道士館訪張山人李時養李是國手

停驂飯深院竟日對薜蘿傲吏玄心近山人幽事多松風煮
茗入梅雨聽棋過東帶愁歸路高眠奈爾何

贈吳山人孺子

湖海逢吳季孤遊復苦吟身從一瓢老情到五言深天地無
家闊煙霞有鬢侵翻應笑禽向嫁娶一關心

山陵事畢還宿新井庵作

不道上陵美更堪歸路閒行行近新月步步惜蒼山得枕元

無住攤書欲未還何如歸戍外秋色卧禪關

贈清上人

綻衲欲何適冷然秋色中
慧根僧臘少綺障道言空
山墮吟邊月松來定後風
可知王逸少名理讓支公

秋懷

水國縱橫蜃氣驕江湖極目莽蕭蕭
常平未下司農策征榷仍聞使者輶
是處軍儲空戰伐轉令吾計屬漁樵
平生意興乘秋盡獨立蒼茫咏大招

飲惠山秦氏園

卜築誰令勝地專錦屏清鏡落樽前
垣扉借綠時時竹石沼分甘處處泉
欲語花枝當客醉半晴山色奈人憐
亦知邱壑

原吾分記取乘春更酒船

需次都下得家兄楚中問并賦新詩奉答

粉署除書頗訝遲武昌魚素正相思
里中白雪應稀和臺上黃金轉自疑
莫學楚人深怨別但逢燕市易成悲
故園花萼秋如許苦向人間寄一枝

進忠姪相遇維亭便挽舟從飲明將有秣陵之行即贈

秣陵在何許能作幾時別猶自惜離羣
維舟遲明月

送吳山人

山人徐汝甯子與客也嘗遊邵武太守明卿館之茲復適閩

落魄吳郎雅好奇挂帆南下採江蘼
樵陽太守能供具兩歲看山到武夷

高岱十六首

岱字伯宗京山人嘉靖庚戌進士除刑部主事出為

景府長史有西曹集九卷

李先芳東岱山房稿伯宗論古詩取法漢魏近體型
 範盛唐十二子李杜之外不淆目中駸駸風雅之門
 牆矣
 胡直衡廬精舍藏彙詩不專瓌壯貴在神韻伯宗詩
 豈所謂氣骨神韻兼而擅之者歟
 明詩選陳臥子曰伯宗詩沈鍊
 列朝詩集伯宗初與李宗伯結社長安進王元美於
 社中及于鱗諸人鵲起而伯宗左遷去遂不與七子
 之列伯宗詩體畧與伯承相似而時多矜厲之語開
 七子之前茅于鱗詩刪錄伯宗詩甚富蓋亦追其華
 路藍縷之勤歟
 廖元度楚風補董傳策張翀吳時來疏嚴嵩父子不
 法狀嵩怒將實重典伯宗時為刑部郎請大司寇鄭
 曉輕之獄上戍邊伯宗復為資裝微服送之嵩父子
 銜之諷銓曹出為景王長史伯宗多論著有鴻猷錄
 樵論楚漢餘談
 田按伯宗擬古窘於步武其自運諸作豪情逸韻在
 當時楚人中較吳明卿魏順甫似為過之

短歌行

春日載陽有酒盈觴與子斟酌娛此景光睠彼庭柯對酒高
 歌歲月云邁來日幾何灌木蒼蒼垂蔭蔽野戴勝飛鳴晨夕
 其下邈邈孤雲中天于飛飄風南來逝將疇依河水無梁涉
 之孔艱沈吟自念憂不可殫豈無嘉賓適不我顧安得讌語
 寫此衷悵翩翩倦鳥返於故林感此踟躕悠悠我心我心孔
 悲誰慰我思西山之薇可以療饑

聞胡羅鄒吳四子遊西山予以病不同作此奉簡

聞君入名山信宿尋蘭若結伴俱清狂被服亦容雅諸天聞
 妙香羣木清長夏琴書蘿月侵衣帶松風灑流泉遶枕席山
 雲落杯筵頓令五蘊空更覺萬塵捨我亦靜者流性復喜在

野抱病獨栖遲勝緣不暫假何時償夙負永結山中社

送蔡若虛赴蘭谿令

寒蟬初鳴芳草歇把酒送君向東越青袍白馬去翩翩雙旌
曉度燕山月嗟君早擅三楚雄揭來獻賦長楊宮仗劍不辭
臨遠道意氣直欲凌秋鴻江南此日多風煙樓船橫海俱茫
然轉輪動地催科速蓬蒿半長逃亡屋璽書拜君君勿輕內
資保障外干城江湖吳越曾爭霸何事年年遠募兵丈夫立
功當立奇礫礫簿領非男兒謝玄不遇淮淝寇空作東山一
布衣

懷李師孟杭州權稅

寂寞憐同調天南一水遙夜寒江閣雨秋色海門潮杪歲腸

堪斷停雲首重翹還朝定何日莫惜寄瓊瑤

秋日閒居

披帙時欹枕焚蘭晝掩關秋聲懸樹杪雨色淨苔斑病以愁
仍劇官因拙更閒篋中多舊草取次避人刪

餞別于韶子相分韻席間作

對酒那能醉憐君萬里行情牽巫峽迴夢入武夷清世難愁
俱切悲歌氣未平千金腰下劍解贈莫相輕

送吳明卿再謫睢陽

謫去君何恨栖遲今古同名從遷客重賦以遠遊工駿骨傾
燕市蛾眉出漢宮黃金臺畔柳折贈意無窮

招李伯承夜過

山東李生久不見篋裡新詩應更多四海論交憐骯髒百年
搔首共蹉跎端居無那愁心切不飲其如白髮何今夜月明
天似水可能騎馬一來過

魏順甫行汪子正叔飲餞御溝之西子以病不能赴補
作

有客移尊入翠微紅塵車馬隔林扉鳴琴一曲作流水唳鳥
數聲留夕暉高會獨憐違伏枕故人無那繫征衣西山滿眼
秋雲白愁見天南一雁飛

送方兆行虞衡赴盧龍別署

東去盧龍塞草青匆匆立馬暫歧亭河山並入吟邊麗草樹
空餘戰後腥萬里胡天悲曙角百年宦迹感流萍憑君爲問

邊城將可汗何時繫漢庭

春日署中卽事

吏散鴉唳戶不扃淡煙疏霧晝冥冥春深藤蔓侵書幌官冷
苔痕滿訟庭客鬢祇從愁裏白故山時向夢中青花陰柳陌
家家醉盡倚東風笑獨醒

燈蛾

物性固有癖附炎豈我情甯投明處死不向暗中生

鷹

狐兔縱橫久高原獵火屯霜寒秋草白莫負主人恩

省中幽興

蔬盤茗椀飯胡麻簿領全稀早散衙滿地白雲雙鶴舞更從

何處覓仙家

子夜春歌

燕語鶯啼春色殘
重門深掩碧闌干
落花滿地無人掃
腸斷東風不忍看

月夜別宗子相

扁舟南下廣陵潮
海樹江雲入望遙
清夜百花洲上月
一尊何日共吹簫

題扇

青山茅屋寄閒身
岸柳汀花色色新
一葉扁舟橫野水
西風愁殺渡頭人

高啓二首

啓字叔崇岱弟嘉靖丙辰進士官兵部郎中有叔崇

遺稿

出塞

塵色暗遼陽
征夫思自傷
當樓織機婦
應爲理衣裳
夢逐鄉關遠
心隨別路長
封侯須及早
莫遣怨紅粧

郊居卽事

採藥春山獨往抱琴幽徑閒
來歸去未妨遲暮柴門月照蒼苔

李襲十二首

襲字于田內鄉人嘉靖癸丑進士選庶吉士除檢討改南禮部郎中出爲副使有太史集六卷

杏山集八卷李裴太史集六卷李蔭比部集九卷李
雲鵠侍御集四卷李雲雁白羽集二卷李雲鴻秋羽
集五卷中惟李裴最知名其詩原出何景明故諸李
之詩大抵安雅有法而頗乏深警之思則才分之不
逮也
列朝詩集本朝以博學聞者莫過於楊用修汝甯陳
耀文招拾用修之謬誤作正楊以駁之于田多藏好
學與耀文相埒著于頃注筆諸書援據該博其持論
多些毀道學譏評氣節而詆謀新建太過言多失實
論篤者弗與也
王士禎香祖筆記李于田撰宋菽圃集二十二卷時
在隆慶初元海內尊向李王之派諱言宋詩而于田
獨闢幽扶異撰為此書其學識有過人者
靜志居詩話于田博洽中州人以擬楊用修而歸田
之後縱情聲伎放誕不羈女優登場至雜伶人中持
板按拍主人知而延之上坐恬然不為怪及去借主
人櫪上馬挾女優連騎而去此其狂態更甚於用修
矣詩亦少深思絕句頗強人意

出京宿報恩寺同龔美

去望君門萬里遙舊遊方丈話中宵世途多妬堪銷骨吏道
無媒空折腰院靜香燈風楫楫春寒松柏雨蕭蕭明朝飄轉
知何處夜夢楚江江上橈

題畫

春水流何遠春雲煖故饒柳邊雙燕子時觸最長條

嘉靖宮詞

歷歷金吾樹影繁瑤壇鐸鼓動黃昏迎和門外燈如晝內直
諸臣夜拜恩

沈水龍涎徹夜焚桂宮芝館結祥雲壇前纔布諸天位苑外

先催學士文

玉貌終年侍禁闈每逢時節賜金緋君王不愛纖腰舞裁作

雷壇拜斗衣

田按永陵用陶仲文言建雷壇於太液池西曰雷霆
洪應之殿有壇有城有轟雷軒有肅風虛雪靈雨輝
電之宅有清一齋有寶淵門有靈安精馨輔國演妙
之室有八聖居有馭仙次各懸以額又別建凝道雷
軒帝晝日常御之

小車飛曳向玄都殿翠羽金翹笑自扶玉螭橋邊長日古內

璫爭買大秦珠

泥金檢玉祝長生萬國封章止進呈月滿西宮更漏永九重

風落步虛聲

霞帔星冠赤錦條玉熙宮裏薦仙桃天王親捧瑤函拜五色

龍光生袞袍

世廟識餘錄上夜坐庭中御幄忽獲一桃左右或見
桃從空中墮上大喜曰天賜也修迎恩醮五日明日

復有一桃降

考鼓吹笙送上清醮壇將罷日初生太平元老偏承寵召聽

鈞天廣樂聲

十五宮娥鬢髮青霓裳初著性偏靈百花叢裏春風靜學誦

玄門諸品經

望嘯臺

飄零湖海笑浮萍一宿雲房尙未能春水泠泠秋樹冷斜陽

影裏弔孫登

戲題

一自封書別建章荷衣常惹蕊珠香逢人白眼唱歌去笑入

西陂秋水長

李蔭 一首

蔭字襲美，弟嘉靖，甲午舉人，授陽穀知縣，改宛平。

遷刑部主事有比部集

王笥詩談李襲美所著有李陽穀詩吏隱軒詩話有句云雙鬢漸於鬕旅白一樽還對假山青
劉侗帝京景物畧古墨齋在宛平縣署萬曆初內鄉李公蔭令宛平發地得柱礎六微有字迹洗視之唐李北海雲麾將軍碑也碑存百八十餘字碑首存唐故雲三字公因築小室砌碑壁間曰古墨齋時貽李言恭有詩紀事云蒼擷史籀不可起蝌蚪鳥迹今已矣書苑千載尊鍾王乃有北海接其軌秀勁首推雲麾碑當年落筆風雨隨何人擊斷成柱礎神物終為造化私歲歲委置荆榛裏瓦礫冰霜竟誰視數字模糊苔蘚封雙螭斷斲斤斧毀吾黨好古有李侯忽焉搜致如琳珍一朝置向高齋壁拂拭光芒動斗牛李侯邀我把酒看白日高堂氣自寒人生屈伸亦如此屈於不知仲知已

歷下弔李滄溟先生

絕代騷人土一邱，大招何處下靈修。蛟龍夜護滄溟穴，風雨

秋生白雪樓。美玉獨增和氏泣，遺文應有茂陵求。隴雲不鎖

東門道，峭華山高起暮愁。

張鳳翼 二首

鳳翼字伯起，長洲人。嘉靖甲子舉人，有處實堂集八

卷

四庫總目鳳翼才氣亞於其弟獻翼，故不似獻翼之狂誕而詞采亦復少遜。靜志居詩話伯起好填詞，梨園子弟多演之，然俗筆耳。其弟叔貽詩亦庸庸，惟幼子小有才，然亦頽惰自放，而吳人之諺比於四皇甫論其工拙判若雲淵矣。

客自江右相尋為我鼓琴

故人千里月，濁酒百年心。從我張銀燭，勞君鳴素琴。風塵俱

落魄山水獨知音末路傷疇昔寒霜滿鬢深

戲王姝禮大茅峯

獨尋仙嶠問三生一縷心香豈世情試展霓裳供法曲應教

妬煞董雙成

張獻翼 二首

獻翼字幼于更名枚鳳翼弟國子監生有文起堂集

十卷

弇州山人續稿幼于五七言近體皆佳而七言尤自
錚錚態度都雅音微清嫩時造真境七言古絕似高
岑而間有費力處押仄韻少操吳音白璧之小瑕也
列朝詩集幼于與皇甫子循暨黃姬水徐緯刻意為
歌詩於是三張之名獨幼于藉甚好易十年中箋注
凡三易做顏氏家訓教戒子弟垂四萬言好遊大人
狎聲伎以通隱自擬築室石湖鵑中祀何點兄弟以
况焉晚年與王百穀爭名不能勝頽然自放與所厚

善者張生孝資相與點簡故籍刺取古人越禮任誕
之事排日分類倣而行之或紫衣挾伎或徒跣行乞
遨遊於通邑大都兩人自為傳侶或歌或哭幼于贈
之詩曰十年分義深相見心莫逆還往不送迎抗手
不相揖荷鍾隨吾行操觚並吾乞中路餽吾漿攜伎
登吾席蒿里聲漸高薤露歌甫畢子無我少雙我無
君罕匹每念故人及亡伎輒為位置酒向空酬酢孝
資生日乞生祭于幼于孝資為尸幼于率子弟衰麻
環哭上食設奠孝資坐而饗之翌日行卒哭禮設伎
樂哭罷痛飲謂之收淚自是率以為常萬曆甲辰年
七十餘攜伎居荒圃中盜踰垣殺之

五言五句傷春

薄暮動絃歌桂檝泛中河破鏡不重照落花難上柯春盡欲

如何

春閨病起和黃得之先生

佳氣抱房櫳年華自不窮山將眉合翠花傍鏡飛紅曉色羅

衣上春愁燕壘中猶憐芳樹下無力倚東風

七夕同趙今燕賦

翠帳紅妝送客亭佳人眉黛遠山青試從天上看河漢今夜

應無織女星

本事詩今燕名彩姬與馬湘蘭同時幼于賦此詩一時傳之由是今燕名重北里

張燕翼 一首

燕翼字叔貽獻翼弟嘉靖甲子舉人

皇甫司勳席送徵君還山

開館招詞客啣杯對夕暉別筵秋氣入蕭寺故人稀細雨飛
歌扇涼風動舞衣獨憐歡賞後惆悵欲言歸

蘇濂 一首

濂字子川濮州人尚書祐子以蔭除鴻臚署丞歷南

光祿署正出為鞏昌通判有伯子集十三卷

海嶽靈秀集鴻石詩俊雅宏壯視厥弟為尤

雜詩

龍且輕韓信劉歆陋揚雄貴耳古已然吠聲今成風
袒褐讀古書志士甘固窮疇能察其端延譽諸王公是非久乃定嗟
哉彼狡童

蘇澹 一首

澹字子冲濂弟嘉靖乙酉舉人有仲子集七卷

背面美人

抱得琵琶下玉除湖山背立溜犀梳傍人欲見春風面但道

朱曰藩 十五首

曰藩字子价寶應人參政應登子嘉靖甲辰進士除

烏程知縣徵授南刑部主事改兵部再改禮部歷員

外郎中出為九江知府有山帶閣集三十卷

四庫總目曰藩詩穠麗得楊慎之一體

山帶閣集序楊升菴云射陂子取材文選樂府而憲

章於六朝初唐不事蹈襲不煩繩削可以鳴世

藝苑厄言朱子价如高坐道人袂衣躡屐忽發胡語

四友齋叢說朱射陂七言律學溫李者可稱入律

明詩選陳臥子曰子价跌宕便辟未損風雅

列朝詩集子价詩風華映帶輕俊自賞嘉靖戊午已

未間子价在南主客何元朗在翰林金在衡陳九皋

黃溍甫張幼于皆僑寓金陵留都人士金子坤盛仲

交之徒相與選勝徵歌命觴染翰詞藻流傳蔚然盛

事田按子价父升之羽翼李何子价則步趨楊升庵子

价有人曰草堂詩引云升庵先生在江陽以畫像寄

我白下揭於寓齋日久虔奉如在函丈嘉靖己未人

日西域金子大輿東海何子良俊吳門文子伯仁黃

子姬水郭子第秣陵盛子時泰顧子應祥相約過余

觴之齋中齋南嚮先生像在壁間諸君不肯背之坐

各東西席如侍側之禮比邱圓鬻中冷泉見餉覓

得陽羨貢茶一角烹泉為供以宣甌注之焚沈水香

於鑪作禮畢就坐各嘖嘖歎曰幸甚今日乃得觀升

菴先生文子曰今日之會奇矣子當作人日草堂圖

以寄先生于欣然拊掌因歌人日題詩寄草堂遙寄

故人思故鄉之句作八闕散諸君請各賦一篇并寄

先生見吾輩萬里馳仰之懷子乃為之引子价詩云
開歲苦陰陰花枝入夜新眾星欣有月七日况逢人
水晶中冷晨香燒南海純形相俱滿意絲筆爛生春
黃滔甫詩云一勺名泉手自調石筵香燼夜遙遙半
生寤寐虛雙鯉萬里容輝挹片綃學海競誇天閣祕
春心欲託帝巫招芳樽潦倒郎官舍江芷皋蘭雨未
消郭次甫詩云先朝金馬重文章三十餘年適瘴鄉
共羨史遷紬石室誰憐賈傅老瀟湘披圖月就金陵
墮飛夢雲牽玉壘長方外遊蹤元不繫欲將瓢笠問
江陽盛仲交詩云人日寒多雨意低洽城春色柳條
齊梅開東閣斜穿檻潮過西洲亂入溪天末丰神勞

夢寐壁間邱壑有詩題碧雲回首人千里巴水東流
援夜唳金子坤詩云人日梅花自可憐折來誰爲寄
西川八行欲附銅魚使四海爭謠白雪篇滇水山川
增氣色錦江花柳隔風煙何時一棹穿巫峽得就揚
雄問太玄子价詩如烏衣子弟風流自賞自是才人
標致

露筋祠

水殿不生塵荷花作四鄰乞靈巫媪醉失歲野畦貧行雨豈
堪賦分風又送人前林霜月白千古見清真

將入雲中作

只尺分胡地崎嶇出漢關敢云杖馬箠聊得視刀鐮蘆捲邊
聲苦楓經戰血殷今宵看太白一上紇干山

贈二谷參省之廣東

二首

牛首南郊寺梅花西塞泉梅林同繫馬香閣互談禪城闕空

多事江山自往年相思一收睫到處是諸天

揚越東南盡朝臺一振衣天晴諸島出秋燠緒風微銅柱馬
人集冰絲鮫女機尊前荔子色偏映使君緋

臨春曲

閣上張星舊在天閣中壁月夜仍圓雲欹宿鬢初臨鏡風研
乾紅未襲箋兩臂舞釵金阿那一聲歌樹玉嬋娟君王萬歲
歡無極肯信江花易夕煙

至北舍作

廬舍疆場步步新誰披平地出荆榛旋呼斗酒會鄰曲便揖
雙墩論主賓井稅未輸須晚稼魚陂盡展入寒蘋洛陽二頃
元知足季子何心復怨秦

高閣凝香晝寂寥秋陰不散氣蕭蕭海田已沒綠草蕩淮雨
猶添白馬湖望裏三山那可往愁邊雙樹暫相饒孟公酒興
年來劇誰把鴟夷一見招

合歡樹上烏欲棲空房織錦竇家妻遙遙夜夜誰能奈三三
五五並相攜鏡花對影慚雙笑燭淚分行伴獨嘯莫道回文
能妙絕陽臺雲雨隔安西

去日流火來肅霜蒹葭大澤鳴鴉鷓龍已卧忽人立遠山
將盡如眉長古寺斷碑羅尹偈碧灣丹樹謝公棠舵樓北望

風煙直好共乘春早雁翔

九日高座寺同少峯兩江二長卿納言石川張公憲使

仲山王公餘峯張公作

省中疏雨點朝陽退食邀賓石子岡高座道人元卓朗過江
諸老每相羊荒臺不見茱萸女清梵猶傳孔雀王薄暮海氛
銷欲盡爲君更盡萬年觴

贈卞虛樓之任廣省

越王臺上海氛收荔子椒花媚遠洲廣府人傳五羊舊卞家
君是六龍優到官先入紅蓮幕按縣應尋碧玉樓二十七峯
秋色裏相思寄我小羅浮

贈吳之山時之山將遊南滁

京兆詩雄吳長公烏巾白帽古人風有時恚怒發座上獨出
歌謳行道中謂我淮陽粗搦管與君江海共飄蓬環滁酒熟
濠魚美豐樂亭前禮醉翁

雲中樂

塞門楊柳未經霜錦帕貂裘馬上裝帶得相思出關去銀釵
嶺上斷人腸

滇南七夕歌 二首

予少日遊滇南見其土風每歲七夕前半月人家女
兒年十二三以上者各分曹相聚以香花水果爲供
連臂踏歌乞巧于天孫詞甚哀婉暇日因採其意爲

滇南七夕歌

高倚銀河搭綵樓女郎三五對拋毬拋罷繡毬無氣力鸚哥
花外月如鉤

一宵爭抵一年長猶度金鍼到繡牀天下真成長會合昆明

池上兩鴛鴦

徐學詩 一首

學詩字以言上虞人嘉靖甲辰進士授刑部主事歷
員外郎中以劾嚴嵩被杖削籍爲民隆慶初起南通

政參議贈大理少卿有石龍菴集四卷

田按以言劾相嵩被杖削籍爲民例須向禮部除名
戶部注籍日暮負創疾馳出都知交無從者俄聞有
策蹇朗吟去國一身輕似葉高名千古重如山者乃
謝茂秦也茂秦豪氣可以挽末世澆薄之風

薊北秋懷

搖落層臺上蒼涼四望孤暮雲低斷壘秋色淡平蕪向夕羊
牛下迎風鶴雀呼歲華看又晚壯志惜長途

邱秉文 一首

秉文字鳴周莆田人嘉靖甲辰進士除永嘉知縣徵
授刑部主事遷光祿寺丞有州峯集

懷方君敬員外

爾從扶持下荆門明月千山響夜猿秋盡蒼梧悲帝子春來
芳草怨王孫座中北海客常滿牀上南華帙幾翻司馬祗今
消渴甚誰憐詞賦滯文園

魏文煥 一首

文煥字德章侯官人嘉靖甲辰進士累官廣西按察

使有石室祕鈔五卷

匡廬天池寺眺望

鴻造肇名山巨靈運神擘勢接南斗懸影落明湖碧聯綿控
九疑沿洄瞰七澤緬邈洪厓子鍊精留窟宅中有青蓮池神
髓流丹液我昔夢遊之茲焉恣所適深巖半銜日鳥道斷行
迹雙劍倚蒼穹飛瀑灑青壁黛色淨林巒煙容變朝夕泠泠
松壑鳴杳杳人寰隔元覽懷遠公勝事謝往昔凌晨別松關
回首片雲白

趙鈇 二首

鈇字鼎卿桐城人嘉靖甲辰進士除刑科給事中進
吏科都給事中遷南太僕少卿以僉都御史巡撫貴

州有無聞堂稿十七卷

四庫總目鈔學出姚江主良知之說文頗磊落自喜亦微近七子之派

瑯琊寺

乘興山行六七里蔚然深秀是瑯琊
遊泉百道常疑雨芳樹千林不辨花
白首何緣來洞壑青山更喜入官衙
酒酣遍歷磨陀嶺東晉樓臺隔暮霞

題秋亭畫

亭皋木葉黃露滴瑤階溼坐待月華生
捲簾放秋入

李萬寶

三首
萬寶字少虛南豐人嘉靖甲辰進士授行人進刑科給事中改南出為廣東僉事遷浙江副使有崇質堂

集二十卷

四庫總目萬寶傳姚江之說其文體平正不事錘鏤猶講學家之格詩頗學韋柳意取清妍雖風骨未就而姿致可觀
田按少虛詩有蕭爽之氣明人講學者有此一派

麻姑山

麻姑之山高嶠嶢瑤壇瓊宇摩青霄峰頭冉冉駐鶴馭花外時時聞鳳簫石函素檢霧長護井浴金丹氣未消羽翰信能遺世網鹿門端合赴佳招

宿軍峯最高處

倒盡松瓢卧石壇滿天星斗醉中看覺來一枕碧山夢落月滿身風露寒

宿建昌縣隆道觀

黃雲古木山中臺洞門端爲山人開夜誦藥珠三百過一雙
白鶴過江來

陳全之一首

全之字粹仲閩人嘉靖甲辰進士累官山西參政有
夢宜山人集

宋高宗鸚鵡

隴山鸚鵡說還鄉中貴傳宣出禁牆漠北有人歸不得思鄉
愁比隴山長

胡安一首

安字仁夫餘姚人嘉靖甲辰進士累官苑馬寺卿有
趨庭集

秋日卽事

流螢飛復下照我獨坐時秋風不解意吹汝到前池

劉景韶一首

景韶字子成崇陽人嘉靖甲辰進士除潮陽知縣徵
授刑部主事改兵部歷郎中出爲貴州僉事進參議
遷副使以右僉都御史巡撫鳳陽有燕臺秋蛩太白

原稿

甌瓶洞橐子成諸篇大自俊逸
楚風補子成始爲郎聲聞七子間
湖北詩徵傳畧景韶詩步武于鱗王元美爲作序頗
有微言而元音亮節自不可掩

贈謝一經

當代推韋布相逢說謝榛詞壇今得汝綵筆更凌人衝斗藏

雄劍投沙弔楚臣千尋標玉樹豈復混風塵

世宗皇帝輓章

金鼎藥成龍已化碧霄香滿鶴空搏從今萬歲齋壇鎖不見
真人戴玉冠

張才一首

才字茂參西安衛人嘉靖甲辰進士授戶部主事歷

員外郎中出為僉事

藝苑卮言張茂參如荒儉渡江揖讓簡畧故是中原
門第
四溟詩話子客都門雪夜同張茂參劉成卿二計部
酌酒談詩茂參曰賈舍人早朝詩及諸公和者可能
定其次第否子曰成卿世之宗匠盍先定之成卿曰
杜其一也王其二也岑其三也賈其四也子曰子所
論詎敢相反顛之倒之則伯仲叔季定矣賈則氣渾
調古岑則詞麗格雄王杜二作各有短長其次第猶

是一輩行或有擬之者難與為倫茂參曰使諸公有
知許誰為同調耶
靜志居詩話元美評茂參詩比之荒儉渡江茂參之
言曰自六義輟講而詩教寢衰五傳異觀而文體漸
裂今昔殆不相及矣務艱者氣鬱而不伸樂易者神
渙而弗耀侈博者意累而靡潔至或思不通圓而極
貌摹倣識未周洽而委心剽竅支戾勿經躊駁可厭
篇帙雖富豈足稱哉其意亦似不滿於歷下瑯琊二
子度其集必有可觀而惜其罕傳里有姚叟澣會問
牧齋宗伯茂參何名牧齋不能答則其論詩之旨聞
之者益鮮矣

過鄴訪謝茂秦

十年作賦共京華一別關山道路賒謝眺詩名驚海內張衡
宦迹滯天涯月明鄴館愁為客雲隔秦山苦憶家知己於今
君尚在未應白首向人嗟

吳桂芳一首

桂芳字子實新建人嘉靖甲辰進士授刑部主事改
 禮部歷郎中出為揚州知府歷浙江布政使以僉都
 御史巡撫福建改郎陽進右副都御史總理河道未
 任進兵部侍郎提督兩廣軍務尋召入以病歸旋起
 故官總督漕運兼理河道進工部尚書贈太子少保

滕王閣

君王歌舞地危閣傲西風夕嶂連雲碧煙江落日紅高文存
 大雅麗藻見天工檻外孤霞起爭誇賦筆雄

劉鳳一首

鳳字子威長洲人嘉靖甲辰進士除推官徵授監察
 御史左遷興化推官遷河南僉事有澹思集十六卷

太霞集

明詩選陳卧子曰子威厚深雅贍不僅涉顏謝之藩
 但意存獨造頗傷冗仄耳豈遽出宗梁下而元美比
 之檜後恐乖公允
 列朝詩集子威博覽羣籍苦心鉤索著騷賦古文數
 十萬言觀者驚其繁富憚其奧僻相與駭掉慄眩望
 洋而歎以為古之振奇人也嘗試為之解駁疏通一
 再尋繹肌理解已而索然不見其所有矣余嘗得
 子威所誦讀遺書觀其丹鉛考索大概於篇中擷句
 於句中擷字自一字至數字而止如唐人所謂碎金
 蒼最者耳其有所撰述也累僻字而成句字稍夷更
 刺僻字以蓋之累奧句而成篇句稍順更摭奧句以
 竄之而字之有訓故句之有韻讀篇之有段落固茫
 如也飽釘堆積晦昧詰屈求如近代之江宜爰李滄
 溟且不可得而況於古人乎韓子曰降而不能乃剽
 賊子威其剽賊之最下者歟
 江左勝談劉侍御子威好為詰屈聲牙之文吳人推
 服之無敢後卜士袁景休每向人抉摘其字句鉤棘
 文義紕繆者以為姍笑子威聞之怒訴於邑尉攝而
 笞之尉數之曰若敢復姍笑劉侍御文章耶景休仰
 而對曰民甯再受笞數十終不能改口沓舌妄諛劉

侍御也
靜志居詩話子威詩襲績纂組節節俱斷俾讀者茫然如墮雲霧中

擬謝石壁精室還湖中

山川異景氣昏旦生煙雲煙雲亦多姿映蔚沓不分稅駕始
山麓舉棹發湖濱巖陰尙含靄谷口欲微曛盡擁洲島趣披
薄沚藻文澄光拖澹澹撫化情欣欣起陵踰世表高揖謝人
羣寓賞非至理信已無紛紜

余文獻一首

文獻字伯初德化人嘉靖甲辰進士除兵部主事歷
員外郎中出爲浙江參政有九匡集

廬山歌贈何吉陽

匡廬山頭白玉臺丹砂瑤草錦屏開海門西望孤飛鶴遲爾
謫仙天上來

任環一首

環字應乾長治人嘉靖甲辰進士除廣平知縣改沙
河滑縣遷蘇州同知擢僉事進山東參政贈光祿卿

有山海漫談三卷

靜志居詩話倭人入犯任公大小數十戰功最多詩
特其奇與然亦明淨

金山九日

佳節逢重九孤蹤寄海涯自憐猶墨綬多病已黃花欲問南
來雁那堪靜夜笳更深眠不得移枕聽嘒鴉

劉爾牧一首

爾牧字長民一字成卿東平人嘉靖甲辰進士授戶部主事歷員外郎中以言事忤嚴世蕃廷杖削籍有堯麓集

妾薄命

自憐妾命薄敢怨主恩移
遣此萋菲日能忘歡樂時
秋風難再熱落葉不勝悲
獨有高樓月流光與恨隨

徐文通 一首

文通字汝思永康人嘉靖甲辰進士授刑部主事歷

員外郎中出為山東參議遷副使有徐汝思詩集

藝苑卮言徐汝思如調鷹兒擊鷲故難獲鮮
分州山人稿汝思詩如登岱雲門汎海諸篇
有古遺響焉
金華詩錄汝思七律是王李社中語

送俞憲使之湖省

紫省多年並海濱
駢駢何處動征輪
楚天舊識乘驄客
湘水重逢作賦人
雲外帝星雙闕曉
樽前黃鶴十洲春
懸知別後能相憶
為向襄陽覓隱淪

王宗沐 一首

宗沐字新甫臨海人嘉靖甲辰進士授刑部主事歷

員外郎中出為江西副使累遷山西布政使改廣西

山東以右副都御史總督漕運兼巡撫鳳陽遷南刑

部侍郎召改工部再改刑部贈尚書天啟初追謚襄

裕有敬所文集三十卷

列朝詩集新甫在比部時王元美所謂與同舍郎王
新甫吳峻伯袁履善進余於社者也元美詩評云新

甫齒最卑最擅曹中稱自謂得初唐未易許也

寄李一吾在告

蚤歲相期共挂冠俄傳疾足竟爭先十年名在甯俱隱萬里
身輕始自全如縷茶煙依竹試半痕紋簞傍花眠馳驅祇恐
雄心在對酒休歌伏櫪篇

江珍一首

王珍字民璞歙人嘉靖甲辰進士除高安知縣徵授禮
部主事遷南兵部郎中出知廣信府歷江西副使浙
江參政按察使雲南布政使改貴州有華委堂集

卽事

東南生事近全稀況復頻驚羽檄飛不惜千金募壯士誰能

一箭解重圍側身天地徒揮淚回首江鄉何處歸推轂喜逢
新節制早銷烽火答垂衣

蔣孝一首

孝字維忠武進人嘉靖甲辰進士官戶部主事

國雅戶部才情綺麗頗任俠氣早歲罷官放浪自適
築山穿池每臨賞輒酣暢忘返

送顧九華還江東

對君賦碧草送君靈山東白馬盤雕鞍驟裏嘶長風路旁柳
枝綠堪折下馬當筵贈離別後夜與君相憶時不獨江南有

明月

汪一中一首

一中字正叔歙人嘉靖甲辰進士授工部主事歷員

外郎中出為江西副使闖廣寇至戰死贈光祿卿諡忠愍有南華山房集

潞河追送吳明卿

暗柳迷征路飛花滿去津潞橋分野色幽獨正愁人湖海多遷客乾坤有戰塵試看今日事何處不傷神

姜良翰一首

良翰字希申金華人嘉靖甲辰進士授南大理評事

擢禮科給事中出為廣東參議改山東進福建按察

使遷廣東布政使有詩文集三十卷

過釣臺

何來一片雲覆此雙釣石不見垂竿人空潭映秋碧

馮熊一首

熊字伯祥金華人嘉靖甲辰進士授工部主事出為

廣州知府

無題

披衣卧明月潛聽江南弄未會美人心和衣不成夢

馬繼龍十一首

繼龍字雲卿保山人嘉靖丙午舉人官南兵部員外

有梅樵集

滇南詩畧梅樵五律清穩七律風流跌宕一往情深田按梅樵詩流傳僅有鈔本五七言近體聲調流美有彈丸脫手之妙保山袁文典輯滇南詩畧六詔詩流賴之以傳雲卿其一也

入蜀

出處天難定行藏自不知忽驚身是客已覺鬢成絲
霜夜征鴻遠秋風瘦馬遲宦情休說冷山水是襟期

昭烈祠

隱隱城南樹荒臺何代邱三分當未運一綫繫炎劉
古壁苔空綠寒溪水自流摩碑嗟往事風雨併生愁

草堂漫興

老去羞彈劍貧來學種蔬草堂三徑菊茅屋一床書
只此浮生足從前世味疏肯因升斗計猶白費躊躇

瀾滄江懷古

孤江鐵索跨長虹鳥道從天一綫通樹響龍來陵谷
雨山空猿嘯石樓風百蠻南詔襟喉地萬木荒祠鼓角
中象馬年來

歸貢賦士人猶說武侯功

雨中憶梁大峨

大江東望水雲浮幾度懷人獨倚樓老去功名成畫
餅向來天地一虛舟鏡中華髮添新恨夢裏青山憶
舊遊鴻雁忽來秋正杪錦官風雨滿汀洲

懷兄弟

楊柳津頭別雁羣殊方音信隔年聞客邊久病愁聽
雨江上思家獨看雲香到籬花秋欲暮夢回池草夜
初分故鄉歸去知何日同醉花前向夕曛

次韻答梁大峨

桃花開盡柳花香十里城南處士莊煙樹萬重開島
嶼水雲

一派見瀟湘園遮紫筍爲籬落地長黃精作稻糧睡起膏騰
無別事看山日日到斜陽

雨中漫述

芙蓉城上雨霏霏濁酒清吟獨掩扉澤國水寒雲不散江天
風急雁孤飛十年彈鋏無人識千里思鄉有夢歸世味從來
渾嚼蠟生涯還憶故山薇

再寄邵纓泉用玉洲韻

五華城外有滇池一託萍蹤住幾時潮落海門秋瑟瑟夢迴
江上草離離百年憂國常看劍千里懷人獨賦詩木脫霜飛
寒又至山中猿鶴怨歸遲

用韻自述

看花猶記少年時轉眼而今兩鬢絲負郭無田惟有債杜門
少事卻多詩水亭帶雨移新竹藥圃鋤雲種紫芝冷煖不須
悲世態絕交久已謝相知

夏日喜晴

北窗睡起獨登樓碧樹含煙宿雨收高柳蟬聲初入夏澄江
風色似深秋青山流影侵書案白鷺分飛狎釣舟莫道故園
歸未得平蕪一望卽滄洲

梁柱臣一首

柱臣字彥國廣州順德人嘉靖丙午舉人官刑部員

外有集

京邸訪歐楨伯

春來聞爾客長安尺素空傳欲見難此日風塵欣把袂明時
詞賦獨登壇吟邊景物年華暮戰後河山暝色寒官拙自傷
寥落久故人猶爲罄交歡

明詩紀事

目錄

張居正

六首

居正字叔大江陵人嘉靖丁未進士改庶吉士授翰
林院編修遷右中允領國子司業事改侍裕邸講讀
歷右諭德侍講學士領院事遷禮部侍郎改吏部兼
東閣大學士參預機務進禮部尙書兼武英殿大學
士加少保柱國兼太子太保太子太傅改吏部進建
極殿大學士加少師兼太子太師特進中極殿大學
士左柱國加太傅太師贈上柱國謚文忠尋奪上柱

貴陽陳田輯

國太師再奪謚削秩籍其家天啟初詔復故官有太

岳先生集六十四卷

穀城山館文集江陵殫精畢智勤勞於國家陰禍深
機結怨於上下當其柄政舉朝爭頌其功而不敢言
其過今日既敗舉朝爭索其罪而不敢言其功皆非
情實也

馮元成選集江陵在事振綱肅紀修內攘外使天下
晏然如覆孟不可謂無功其苞苴餽遺多却而少受
不可謂黷貨惟是好攬權而喜附已則於賢者若擲

沙遺潘而莫之恤於佞者若嗜醴悅羶而莫之厭故
一時舉措多拂人意又其交內豎以固位進珍玩以
希寵甚非大臣之道至於奪情拒諫鼎甲其子而名

行大墮人心大失矣
田按江陵作楊襄毅墓誌云公在木兵久徧歷諸鎮
躬履戎行練習邊事余每從公問今中國所以制禦

夷狄之策及九塞險易將士能否如指諸掌故余在
政府措畫邊事蓋得之公為多又云一日之內神遊
九塞者再三宰臣不如此安能禦外侮其九塞稱臣
詩云暮南秋色靜王庭月滿邊關夜不肩真稱心語

恭題文皇帝四駿圖

龍駒 鄭村壩大戰胸著一箭都指揮丑丑拔箭

天馬徠翼飛龍蹠削玉耳垂筒碧月懸雙頰明星貫兩瞳文

皇將士盡罷虎復有龍駒助神武流矢當胸戰不休汗溝血

點桃花雨壩上摧鋒第一功策勳何必減元戎君不見虎士

標題麟閣裏龍駒亦入畫圖中

赤兔 白溝河大戰胸著一箭都指揮亞失帖木拔

箭

雷錫錫北軍來赤兔走黃雲開攬身超夾澗策足絕浮埃白

溝原頭振鞞鼓貫陳穿營猛如虎穆王八駿詎為奇昭陵六

馬應難數百戰間關未解鞍箭癡還向畫圖看只今四海昇

平日誰識當年締造難

棗騮 小河大戰著兩箭胸一箭後右曲池一箭安

順候脫火赤拔箭

紫騮馬金駱月朝刷燕晡秣越俶儻權奇超驥走滅沒當年
萬馬盡騰空就中紫騮尤最雄戰罷不知身著箭飛來祇覺
足生風北風獵獵吹原野長河冰澌血流赭誰言百萬倒戈
中猶有彎弧射鈎者

黃馬 靈璧縣大戰後右曲池著一箭指揮鷄兒拔

箭

軒后興應龍翔駕天駟乘飛黃迴頭看紫鸞顧影失超光君
王神武古來少萬里煙塵一劍掃馬蹏蹏處山為摧何論陳

暉與平保揚鞭渡淮淮水清金陵父老壺漿迎從此華陽休
駿足山河重整泰階平

筆塵萬厯丙子上於禁中檢得成祖四駿圖以賜相
君四駿者成祖用兵所乘也相君為題詠奏之上悅
賜金
田按四駿圖詩見太岳集穀山筆塵所云相君題詠
奏之即指此四詩竹垞詩綜誤屬之王文端余檢文
端集亦無此詩

山司徒

巨源江海情本欲全高尙瀟灑秉樞軸疇能測弘量密識既
淵沈清心亦玉亮談笑獎人倫千齡稱哲匠

孝恪皇太后遷祔輓歌

毓聖恩無極遊仙夢不歸載逢玄隧改重念紫宮違帳殿松
陰合鈴歌薤露晞永陵原上月今夕見重暉

周思兼 一首

思兼字叔夜松江華亭人嘉靖丁未進士除平度知州徵授工部員外進郎中出為湖廣僉事以憂歸起

廣西副使未赴卒有叔夜集十一卷

田按叔夜文筆矯健詩乃平衍亦才有短長耳

馮鍾山移居天馬山

問君何事耽邱園數畝清陰花竹繁片帆來往浦雲溼孤嶼
微茫江月翻春深幾時共攜酒山靜有人頻叩關林泉風物
總堪隱豈與朝市爭逐喧

王樵 一首

樵字明逸金壇人嘉靖丁未進士授行人遷刑部員

外出為山東僉事以疾歸起浙江僉事擢尚寶卿改

南鴻臚卿尋罷歸再起南太僕少卿歷光祿卿大理

卿刑部侍郎進右都御史贈太子少保諡恭簡有方

麓居士集十一卷

四庫總目樵詩冲和恬澹不失雅音
靜志居詩話方麓研心著書詩特游藝然清婉軼倫

江夏沌口

夕陽高柳數家叢葦汀煙百里蒼然平楚蕭疎時見大江渺

瀾

殷士儋 一首

士儋字正甫歷城人嘉靖丁未進士選庶吉士授檢討充裕王講官歷右贊善洗馬侍讀學士掌翰林院

事進禮部侍郎改吏部拜禮部尚書加太子太保兼
文淵閣大學士入閣辦事進少保武英殿大學士贈
太保諡文通改文莊有金輿山房集十四卷

野獲編殷歷城罷相在里張江陵以宋詩為對聯寄
之曰山中宰相無官府天上神仙有子孫蓋諛與嘲
各半

月夜同于麟茂秦集伯承宅話遊西山

同有秋山期塵羈負奇絕因君話碧雲為我歌白雪煙蘿憶
幽深霜月對高潔便欲乘風遊禪關叩真訣

樂孔原之溧水

祖席秋風晚芳洲白露零銅章秦茂宰綠鬢漢明經弭棹寒
依浦移帆曉帶星潮聲揚子渡王氣蔣山靈蘿月當琴館棠

陰蔭訟庭別來幽思切春草望中青

林癭一首

癭字貞恆閩人尚書庭機子嘉靖丁未進士改庶吉

士授檢討歷修撰洗馬國子祭酒太常卿擢禮部侍

郎改吏部又改南吏部就遷工部尚書改禮部贈太

子少保諡文恪有集二十二卷

東南嶠外詩話何鏡山閩書錄文恪閩中三公詩一
為開府張公岳一為太宰李公默一為司馬張公經
也詩云開府元凱倫特達廟廊器代工感熙明濟世
懷深志直道諒難容險阻方歷試長驅百萬師深入
不毛地鬼方難已夷魏闕戀空積霧雨晦遐陬前軍
大星墜青編勛業崇赤縣經綸秘千載峴山碑行道
空垂淚太宰風塵表盛名自弱冠揮塵吐清言登壇
弄柔翰振羽覽德輝高舉凌霄漢既懷人倫識復負
經世幹蛾眉不見容貝錦紛為患淒涼梁獄書惻愴
東門歎精忠諒若存耿耿南箕煥司馬文武才磊落

萬夫望平生覽穰苴笑談在帷帳雲擾亂江東據鞍
一何壯未寒息壤盟已速中山謗哀哉誰爲明功高
不相讓鶴唳甯復聞弓藏漫惆悵千秋麟閣勳終記
青冥上三詩質實典重足當詩史
田按文恪家世以科名鼎貴留心著述嘗輯福州府
志三十六卷官禮部侍郎時上備邊七策慨然有封
狼居胥意其歷舉一時邊將如梁震貪而智於劫營
揚照傲而勇於赴敵周尙文嫚罵而仁於撫士評騭
各當史第云寇犯邊條上七事而不詳其語予特著
之

榮淑康如挽歌

金屋恩方盛瑤池宴未終忽驚鸞掩照竟逐鳳乘空壟樹凝
煙黛宮花泣露叢霓旌千騎送悽惻九原中

陸光祖 一首

光祖字與繩平湖人嘉靖丁未進士除知濬縣遷南
禮部主事改北進郎中改吏部遷太常少卿以事落

職起南太僕少卿未上擢本寺卿就進大理卿尋改
北遷工部侍郎引疾歸起南兵部侍郎召改北吏部
出爲南兵部尙書再引疾去起南刑部尙書就改吏
部入爲刑部尙書改吏部贈太子太保謚莊簡

彭城

宰木蕭蕭起暮風君王不復渡江東舞衣滿地生新草過客
沿溪問舊宮垓下一朝騅不逝咸陽二月火徒紅英雄轉門
無完策四面悲歌入帳中

田按莊簡彭城詩詩綜作金陵懷古今正其誤

宋儀望 一首

儀望字望之吉安永豐人嘉靖丁未進士除知吳縣

徵授御史擢大理丞以忤嚴嵩旨貶夷陵判官嵩敗
擢霸州兵備僉事進大名副使改福建左遷四川僉
事累遷大理少卿以右僉都御史巡撫應天進右副
都御史就遷南大理卿改北有華陽館集二十六卷

滕王閣

滕閣崔嵬江上開青春獨坐思徘徊自憐老子興不淺無那
美人期未來檐駐彩雲歌舞散汀迷芳草綺羅灰登臨無限
凭闌意日暮城頭畫角哀

甘茹一首

茹字征甫富順人嘉靖丁未進士除御史累遷山東
按察副使有已癸草入秦草歸田草拔茅山人草等

集

張桓侯廟

旅泊雲安縣重瞻漢將祠風雲生叱咤日月照鬢眉故里真
王盡空山杜宇悲一編存帝紀魂斷隕星時

游李符卿西園

坐對青山暮歌聽白苾長池亭無六月高樹領新涼

楊繼盛一首

繼盛字仲芳容城人嘉靖丁未進士除南吏部主事
入為兵部員外郎坐論馬市貶狄道典史稍遷諸城
知縣徵授南戶部主事入為戶部員外改兵部疏劾
嚴嵩論死贈太常少卿諡忠愍有集四卷

弇州四部彙揚公繼盛臨當赴義出所著年譜授其子應尾日後十年可開也復為詩曰浩氣還太虛丹心照萬古生前未了事留與後人補慷慨曼聲長嘯以沒

送史沱村考績 代人作

一上離亭幾度愁十年塵夢歎沈浮悠悠月笛山城夕漠漠
寒雲江樹秋作客南來俱萬里送君北去自孤舟他鄉正有
思歸興况復征旌出石頭

彭輅 一首

輅字子殷嘉興人嘉靖丁未進士除江西布政司照
磨遷新淦知縣左遷應天儒學教授進國子監博士
南刑部主事有比部集八卷

四庫總目焦竑稱輅於七子盛時意氣高簡不少貶以就俗今觀集中多與王世貞酬答之作體格亦近七

子竑所言不盡然也
構李詩繫子殷詩工選體五七言律浸淫唐人風致
靜志居詩話先生早慧於詩文不甚敦琢其持論取
法中唐謂神在象外象在言外言在意外然率矢口
肆筆而成頗類解大紳卞華伯一流昔人所以有才
多之憾也

追憶孫太初

生平落魄是潛夫袖有煙林五嶽圖海上碧雲看不斷墓前
明月意同孤葛翁去住餘丹竈阮籍浮沈只酒壚問爾吟魂
春雨外時應飛鶴過西湖

章适 一首

适字景南蘭谿人嘉靖丁未進士除行人擢禮科給
事中有道峯集六卷

四庫總目适詩頗娟雅而醞釀不深
金華詩錄景南五古步趨陶韋得其韻趣

雜題

合沓溪上山白雲何時休滄波杳然去碧樹含清幽溪亭闌
無人獨往誰爲傳坐惜年歲晚終隨魚鳥遊

胡杰一首

杰字子文豐城人嘉靖丁未進士選庶吉士累官太
常卿有劍西橐

夜坐

秋月夜窗虛幽人此索居了無塵事擾僻與世交疏倦息勞
生計冥探大化初翻憐碧山客辟地苦焚魚

孫永思三首

永思字性孝蒲州人嘉靖丁未進士除行人擢浙江

道御史

冬日登王母宮

回嶺千年王母祠含風眾壑迴仙姿空聞青鳥來金闕不見
蟠桃進酒卮涇水有聲天地轉瑤池何在古今悲穆王八駿
無消息黃竹歌殘雪滿枝

江上曲

春雨旣過行水濱江花汀草相鮮新牧童歌上前山去愁殺
江邊行路人

山門

山門日落望江干雲樹微茫晚色寒欲向東南歌一曲鷓鴣
聲裏杏花殘

陳嘉謨 一首

嘉謨字世顯廬陵人嘉靖丁未進士授廬州推官擢戶科給事中出為四川副使引疾歸起湖廣參政不赴有念初堂長春堂山斗雲居諸集

西臺寺

修竹西臺寺前朝太守祠我來尋勝蹟事往見殘碑舊賞青山在仙蹤白鹿隨空令人代隔懷古有餘思

田按西臺寺舊為南唐吉州守劉竺生祠竺守郡時政暇登山習靜有二白鹿隨車此詩所謂仙蹤白鹿隨紀其事也

張元諭 一首

元諭字伯啟浦江人嘉靖丁未進士除工部主事歷

員外郎中以忤嚴嵩謫常州判官歷吉安桂林永昌知府擢雲南副使有蓬底浮談詹詹等集

心遠亭

結亭俯人寰青山遙映帶客心遊冥冥更在青山外

程嗣功 一首

嗣功字汝懋歙人嘉靖丁未進士歷浙江參議廣東布政使進南戶部侍郎總督糧儲

黃山

名山自古曾招隱此日歸來愜素心欲解瑤琴坐流水白龍潭上坐松陰

鄭東白 一首

東白字叔曉莆田人嘉靖丁未進士歷官廣東僉事
獨酌有懷

不必論身世高陽一酒徒
岩居甘鹿豕浪迹傲江湖
華髮時名拙青樽客病蘇
木蘭二三子何處問當鑪

王君賞 一首

君賞字汝懋淄川人嘉靖丁未進士歷御史遷苑馬
寺少卿有抱一詩稿

舟次維揚寅亮弟以使事相值

江上波濤險尊前骨月親
山川熟宦味雞酒共離人一棹夕
陽色長歌天地春蕭蕭雙雁影何處不風塵

劉應時 二首

應時字子易洪洞人嘉靖丁未進士累官副使有中

齋集

謝四溟初相值卽以婚娶歸東山予以相見之晚輒復

睽違賦此志別

相逢燕市一悲歌別去匆匆奈爾何
海內弟兄知已少天涯兒女夢魂多
金臺白雪明書劍銅雀春雲瑣薜蘿
它日思君倍惆悵帝城東望渺煙波

孟縣值初度

寥寥客裏逢初度況復驅車天一涯
民事不知還問俗君恩未報豈言家
山川舉目悲風物霜露沾衣感歲華
恰喜河陽花滿縣強移樽酒對殘霞

馬一龍 一首

一龍字負圖溧陽人嘉靖丁未進士選庶吉士歷官

國子司業有遊藝集

藝苑卮言馬司業用筆本流迅而乏字源淡澹大小錯綜不可識折看亦不成章

詹氏小辨一龍法素師聖母文頗得筆法

書史會要一龍作字懸腕運時落管如飛頃刻滿幅自謂懷素以後一人然評者謂其奇怪為書法一大

明詩統司業性豪侈善草書詩亦豪雋大有時譽

送陳玉泉

白下聞君三十年碧霄黃鵠思翀然幽懷自擬陶彭澤大雅人傳李謫仙春晝南歸花似錦大江西去水如天今朝共向都門別迢遞關河月滿川

章美中 一首

美中字道華吳人嘉靖丁未進士除大理評事遷左

寺副出為江西僉事歷廣西參議遷四川副使

仲春虎邱

孤閣生殘照平臺下夕陰疏鐘不知處人影在花林古剎雲光杳空山劍氣深依依池上月猶復照登臨

陳良珍 一首

良珍字在璞南海人嘉靖己酉舉人官永州丞有在

璞集

園中夜別友人

南園惜分襟商聲夜未歇池草澹微霜風林墮纖月殷勤盡

餘觴華舟戒明發去矣增離憂關河正修越

秋思

鷓鴣聲殘歇眾芳紛紛桐葉滿銀床門臨水國秋多雁寒入
金塘夜有霜旅館蕭條依橘柚故人迢遞隔瀟湘浮雲萬里
奄西北日斷關河幾夕陽

中秋

章美中

明詩紀事

貴陽陳田輯

國寶

鄭國寶

十三首

國寶字汝嘉蘭谿人嘉靖庚戌進士除婺源知縣徵

授兵科給事中改禮科以事廷杖削籍有卧雲堂集

田按汝嘉以趙文華子擇思齋祀停封日請假送父
帝大怒戍澤思邊衛以禮科失糾劾汝嘉與都給事
中謝江等六人廷杖削籍歸時年三十八自號樸里
子汝嘉七言歌行五絕七絕風流跌宕大有古人遺
韻

關西老將歌

少年騎馬疾如飛長弓勁箭突重圍萬乘曾推雙轂送五侯

揖讓平交歸瀚海黃沙連朔漠天山月白聞邊柝一身轉戰
三千里陰風颯颯陣雲惡奮臂前驅斷月支橫行又奪胡馬
騎雕戈白日明秋漢大漠霜高響鐵蹶塞下人傳老都護軍
前共說長城固豈知歲月漸蹉跎老大逢人不相顧射虎將
軍竟不侯牧羝歸來空白頭聞說燉煌徵猛士關西老將淚
先流

士兵行

姑蘇城上烏夜啼姑蘇城下水平溪黃狼走去白狼逐士兵
攫得蠻兵妻花巾裏頭白裏腳勁弩強弓隨部落蘆管嗚嗚
夜劫商搶得黃金充囊橐海上鯨鯢終可除中州狼虎不堪
居一朝封豕衝突起殺人之性還有餘

金華詩錄嘉靖間東南倭患棘總督尙書張經徵四方兵及狼士兵議大舉趙文華獻平倭七策因遣祭告海神即察賊動靜文華陰欲攘經之功狼兵稍有斬獲厚犒之使進勦土兵猖獗所由來也初贛州賊作亂都御史陳金奏調廣西狼兵征之李獻吉作土兵行當時情形亦復爾爾

聞歌

十二秦箏壓指彈雲屏步障最相憐流霞暗度樓前月散穀
明透瑤瑁筵羅綺紛紛爭相愛芙蓉千尺明仙隊小腰誰復
惜瓊枝乍汎風光上環珮梁塵暗落起新聲門寵含情滿座
驚眼中粉黛空姝麗盡道蛾眉恨不平別有高臺上涼日朱
蕙翠幃遙相憶春風來蕩河陽花楊柳低纖堪把惜鴛鴦宛
轉金縷函翡翠玲瓏雲錦絨華燈忽照珊瑚枕小婢收將火
浣衫長安貴客金如土袒臂登堂愛歌舞當壚快飲三百杯

長江作醉虬作脯不道今生不解愁相逢便欲脫吳鉤殷勤
那計百年事白日聊隨江畔遊

聞陸錫山掌科落職

造物忽如此君才獨可憐風塵餘白首窮達付蒼天夜雨燈
前草秋帆渭上船逐臣應有恨遲爾越江邊

縱鹿

并序

山人饋余鉅麋頭角崢嶸然毛色純黑疑千年物也
決藩縱之侑以四韻他日相見于瓊玉山頭須爲余

頓轡華陽洞口

谷口隱深霧重巖午不分此間有豐草好去卧玄雲樵客醒
殘夢宜春憶舊羣赤城應不遠爲我訪茅君

古別離

江上芙蓉花一別一回老看取秋風來紅顏爲誰好

古意

海門初日上照見望京樓下有北去船揚帆過石頭

小園

簾捲風生席墻低月到庭豆花棚下坐一卷種魚經

柳枝詞

二首

白板橋邊楊柳枝美人樓上勸瓊卮千條萬縷不堪折舞翠
臨風欲向誰

水榭風生而地垂曉粧臨鏡門蛾眉未須展盡黃金色不與
江亭管別離

邊詞

白骨未收城下土黃沙又起塞邊風孤城百戰心猶壯夢裏
還開五百弓

畫鷹

萬里長風吹雪毛霜眸歷歷見秋毫須教平野無狐兔眼下
何人為解條

驄馬

驄馬金羈碧玉鞭玉郎騎坐入幽燕醉來忽墮青絲轡又向
高樓一夜眠

徐學謨十六首

學謨初名學詩字思重改字叔明蘇州嘉定人嘉靖

庚戌進士授兵部主事改中書舍人以憂歸起禮部
郎中出為荊州知府以事罷歸起南陽知府進湖廣
副使改江西以右僉都御史巡撫鄖陽擢禮部尚書
加太子少保有海隅集七十七卷春明稟十四卷歸
有園稟二十九卷

靜志居詩話宗伯本名學詩以與劾分宜者同姓名
遂更為謨雅負詩名然多儒響殆肖其人
田按宗伯論詩云近來作者綴成數十豔語如黃金
白雪紫氣中原居庸碣石之類自以為前無古人小
兒效顰引為同調南北傳染終作癘風蓋為學王李
者而發又謂王元美兄弟詩文皆作秦聲初閱則驚
細觀則厭然余閱其全稟五古趨步晉宋時有合作
七律猶是李王成派七絕流美頗有俊聲其才去李
王甚遠觀其海隅集自敘云塵三十年之力揆於今
之作者猶夢夢也矧曰古之人哉自知審矣宗伯頗
好事在荊州日招致鵞池生輩引為上客又作世廟
識餘錄其語頗覈此書余得藏之

仲夏日同田祠部楊白二主客集郊壇道院

端居積煩憂出門厭塵鞅茲晨邁休暇忽起中林想折簡呼
友生攜樽恣還往偶依羽士邱立宮信幽敞暫解區中累果
諧心所賞榻靜山鳥窺庭虛夏木長白日銷篆煙青霞映書
幌當杯析疑義會意忽抵掌境悟寂喧齊妄遣神氣爽儵然
洞元化何似軒皇上終宴已忘疲清歌激慨慷還真如可期
及爾長偃仰

仲夏望日省僚宴集分韻得併字

燕州鬱徂暑端居想幽潮睠茲窈窕宇扶疏夏木盛賓筵襲
蘭馨華裾朗玉映無煩折簡呼都忘倒屣迎散吏意俱適佳
晨酌頻命雖處朝市喧而有雲林靜車馬自馳驅颯埃日紛

送何如罹素襟相將發高詠逍遙聊卜懽沈冥已中聖爲謝
同心者幽期稀合併

遊大慧寺作

塵羈埋素襟幽遐發深省物化諒有遷哲人貴所秉竭來倦
風埃休期析合併矧茲秋氣佳鞅掌獲暫屏驅車遵郊陌雲
天恣引領修途逗叢棘忽入招提境躡磴慰冥搜捫蘿啟幽
騁秋榮麗寒渚朔吹披霞嶺爲從火宅來聊憩空門靜慧性
覺方始迷津誤已永未淨皈依心相睇虛無影肅駕謝珠林
徘徊延夕景

徐園訪金伯謙諸友不遇

久知客郊園炎月阻相訪茲晨邁新霽凌風開颯爽肩輿一

乘興巖扉啟幽敞山中靜無人蘿陰滿書幌坐餘几閣涼愛
此菱蒲長秋事已如斯平疇鬱嘉穰雖乏晤對懽頗諧素心
賞適去復適來聊當看竹往

頭陀生行

并序

頭陀生者故遼藩弄兒國亡後祝髮入道爲襄陽羅
者所得余哀其窮釋焉作是篇

江陵昔日重驩宴侍兒俱在芳華殿酣歌那省風愆篇狎比
惟看佞幸傳是時頭陀生幾年鬢雲繚繞垂兩肩宮娥望幸
不得前眾中一身當三千自謂穠華可長久狂飈忽集章臺
柳天上纔飛司隸章宮中已授邪臣首白馬盟寒帶礪空黃
龍讖應狐狸走六王之鬼餒不脯曳裙賓客爲鉗徒頭陀何

物么麼者飛身化作崑崙奴袖間金錯一七首腰下赤羽雙
僕姑禁門躍出青天杳白日重關失萬夫往日紅顏堪一擲
行雲過眼湘江碧黃金散盡舞臺傾青鬢悞身眞可惜轉盼
君恩不到頭并刀斷送舊風流欲尋雲外龍堂寺不覺秋深
燕子樓浮生如露亦如電流浪年光颯飛箭傷心莫話轉春
鶯埋骨堪投定惠院榻來何事逐紅塵猶是從前一幻身香
飄膩玉侵羅帔淚決流波溼漢津紫盃白衲強裝束伶僇還
帶雙蛾蹙階下低頭望使君十年前是荊州牧奏當還識聖
恩寬讞書終貸伶官戮故國淒涼莫歎嗟飄零行腳向天涯
縱然未了三生債更望何門認主家

齋夜有懷籜冠生宋登春

戊角遙聞城上頭相思眞擬隔三秋寒蟬欲斷歲云暮江葉
不飛人自愁隱幕疏花閒短榻持杯殘月在高樓鴛池今夜
酒應熟野白荒荒誰勸酬

秋日登滕王閣

江島浮空浦樹分人煙生處俯氤氳千層白浪帆檣雨一片
青山殿閣雲簾棟故應留勝概斗牛猶自護遺文庾關客思
秋無賴淼淼汀花雁夜聞

袁履善有鞏昌之命喜而有述

去日能忘范蠡船俄聞五馬出秦川江東秋老蓴鱸後渭北
風高鳥鼠前今代吐蕃頻款塞漢家都尉欲臨邊逢人拂拭
新髯色誰識投沙故少年

泳飛閣

鳥飛詎能泳魚泳詎能飛吾居魚鳥間川雲澹相依

梨花

隔泝飄殘雪隨風拂晚驂相逢禁火節江北憶江南

荊州上元曲時在長安旅舍作

春風初到萬家城火樹銀花相映明高結綺樓橫十里沿街

齊唱上元晴

辛酉元夕嘗爲此曲

雕盤翠幕總繁華誰似朱城帝子家雲母屏中輝紫電珊瑚

樹底發流霞

千花騎擁白雲橋月淡煙霏溼絳綃試聽玉壺沈漏水西宮

隱隱出鸞簫

章華臺迴接沙津隊仗如雲引路塵錦障紗籠移鶴輅香風
散作十街春

田按此數詩述遼邸故事也

清明日作

黃河東去淨春沙一曲溪流似若耶馬上不知寒食過村村

風雨暗梨花

得江陵諸王書答之

故國園池重別離敢將雲壑傲明時如今問我樊川業恐是
前生杜牧之

劉效祖二首

效祖字仲修濱州人嘉靖庚戌進士除衛輝推官徵

授戶部主事歷員外郎中出為陝西副使有雲林橐

六卷

海嶽靈秀集仲修七絕得盛唐氣格李伯承之亞也
靜志居詩話副使負經世畧生計吏罷官晚寄情詞
曲所填小令可入元人之室昭陵嘗遣中使索其題
冊呼曰念菴念菴副使別字也因賦詩云更生雙鬢
已蕭騷敢謂文章擅彩毫過誤偶承明主問因緣不
是鬱輪袍都人傳其事以為列朝所未有
田按副使七絕風調俊爽王阮亭香祖筆記欲輯其
鄉邦前輩明人有集者五十家而遺副使名則雲林
橐流傳之鮮可知矣

塞上曲

朔風吹雪渡沙場傳道單于獵白狼北望征塵何處是暮雲
無際草蒼茫

折楊柳

已錄卷下

楊柳千條拂地垂春風宕漾客心悲誰家年少輕離別偏把
愁聲笛裏吹

陳宗虞 一首

宗虞字于韶閩中人嘉靖庚戌進士累官江西副使
有卧雲樓橐六亭集

弇州山人續橐甚矣詩之難言工事則俳寒而傷情
工情則婉綽而傷氣氣暢則厲直而傷思思深則沈
簡而傷態態勝則冶靡而傷骨于韶爲詩亡不兼美

送胡生南歸

扁舟一葉故園心斗外輕帆認武林欲採芳蘅何處泊太湖
湖上水雲深

張四知 一首

四知字子畏汝陽人嘉靖庚戌進士除刑部主事歷
兵部郎中出爲四川僉事遷副使有韶亭集

送盧少溪憲副還東陽

朔風吹野酌去路沂通津旅邸相知少天涯送別頻青山幾
載夢白舫一歸人海內塵方擾君輕避此身

董傳策 三首

傳策字原漢上海人嘉靖庚戌進士除刑部主事以
劾嚴嵩下詔獄謫戍南甯隆慶改元起吏部主事歷
郎中累遷南大理卿進工部侍郎就改禮部有采薇
集四卷幽貞集二卷豈歛集六卷廓然子橐二卷蘧
盧橐七卷

四庫總目傳策詩多激烈如其為人
雲間志畧幼海詩文有湘纍長沙之風
松風遺韻抱一山人詩如兩岸青山天外落一帆明
月鏡中開落日玄猿嘯峻嶠成樓清角下寒灘閉戶
共沾分歲酒當筵俱是異鄉人蝴蝶夢中江草碧鷓
鴉嘯處嶺雲黃天涯作客憐同病人事經秋苦獨吟
皆警拔之句
田按侍郎以繩下過急為家奴所殺恣睢者可以戒
矣

赴戍過馬頰同吳君時來張君翀作

客行九千里舟過十八灘山疑三峽險水似五溪寒
 挂纜蒼松杪停橈白石灣路難何足問此地是平安

訪客啜檳榔

急腳蠻奴髻半斜客來提榼手雙叉檳榔擊出斑斕片
 灰白萋青當獻茶邕人以青萋葉白灰和檳榔啜之客至盛榼以獻謂之代茶

寄橄欖

波斯薦翠味回甘嶺樹秋高拂瘴嵐記得吳都會有賦
 錫飯密緘到江南邕橄欖最佳名波斯種法用錫飯包之雖寄遠不損

邱橐一首

橐字懋實諸城人嘉靖庚戌進士授行人擢刑科給
 事中進兵科都給事中以事黜為民隆慶初起禮科
 未至擢南太常少卿進大理少卿以病歸萬厯中起
 右通政未上擢右副都御史進刑部侍郎拜南吏部
 尚書贈太子太保謚簡肅
 戊辰元夕吳太宰張侍御移尊見過
 煙柳三山寺燈花九陌橋年華殊不負春思轉無聊忽聽尚

書履兼鳴驄馬鑣高軒曾有賦未便是元宵

黃甲 三首

甲字首卿上元人嘉靖庚戌進士除吏部主事謫秦州運判遷東郡監州旋罷歸有鳳巖編年稿二十六

卷

顧起元客座贅語藝南詩頗饒獨詣所著獨鑒錄評

詩文多前人所未發烏衣佳話首卿詩陳氏園亭云曲徑沿溪入疏峯帶

雨晴春日云鳥聲侵夢斷竹色映階虛秋興云山高

月出雁初下水遠天空人自愁天甯寺云短劍孤懸

凌夜月做裘初紉薄秋風

田按顧太初云首卿性好物居鄉與往還者不二

三人晚與廖工部文光善數共醵詠一日廖規其集

中有陣毯等語宜大刪遂大詬罵絕之今觀鳳巖編

年稿拉雜支離如陣毯者多矣所著獨鑒錄即在編

伯祖儒著諫鳳巖覺集仲成儒著競辰齋集叔方儒

臘日寄阮按察

不見風流阮嗣宗向來孤性苦為同歲殘瑤草空相憶夢入

深林恐未通隴上梅花還雪色山中竹葉幾春風欲知此日

懷君處正是東山寒雨中

題畫

十里修林帶石橋茅堂背郭隱松濤故人何地來相訪共卧

白雲山月高

河亭

孫楚樓前放酒船秦淮堤上買花鈿誰家錦幃開新月百尺

著陌花軒集季復儒著振秀閣集今皆失傳惟戊儒詩散見鳳巖稿中如乾坤萬變等蕉鹿英雄一笑齊金瓦又覽鏡漫成嘸孤生只幻塵又試問餘春應幾許尊前莫靳歌金縷殊是俊句

危欄水泊天

王好問 三首

好問字裕卿樂亭人嘉靖庚戌進士除太常博士遷御史歷大理丞通政使遷工部侍郎改刑部戶部進南右都御史就遷戶部尚書贈太子少保有春煦軒集三十六卷

王崇簡畿輔明詩王公好問詩閒淡得陶韋遺意

逢樵者

秋雨洗林麓草色澹寒碧颯颯風吹衣泠泠泉激石偶同樵者行雲閒意俱適猿嘯幽谷靜鶴唳空山夕微鐘發暝煙明月送歸客

休沐

暫從賜沐暇適出曠遠情散步出虛齋坐聽山鳥鳴疏雨動微涼纖雲弄晚晴尋幽涉竹徑不知新筍生道人偶相訪遺我沖虛經大道惡多歧全身貴逃名真言誠可擇吾心本無營

來江亭晚眺

長空湛湛月朧朧南國江山如鏡中六代遺蹤何處問秣陵寂寞起秋風

方弘靜 一首

弘靜字定之歙人嘉靖庚戌進士除東平知州遷南戶部員外歷郎中出爲四川僉事歷江西副使進參

政遷廣東布政使以右副都御史巡撫浙江罷歸起撫鄖遷南戶部侍郎贈工部尚書有素園存稿二十

卷

新都秀運集定之抱性幽閒溫秀故其修詞吐氣有似於人若流水不知處幽禽相與飛不知春色減忽見林花飛永日空山寂幽蟬時自吟宛然王孟遺響也

訪程山人不遇

避喧來谷口愛此青松陰永日空山寂幽蟬時自吟花源應未隔蘿徑杳難尋稍覺塵心豁方知仙境深

馮泉謨一首

泉謨字明卿海鹽人嘉靖庚戌進士官刑部郎中出為江西僉事歷廣東參議副使進福建參政有豐陽

集十一卷

宿石屋山寺

青天萬仞插芙蓉迴合珠林翠幾重秋老荒苔飛葉墮客來燒芋有僧供雲脚佛閣金鋪暝山磬仙壇石髓封聽法欲尋龍起處滿空寒瀨夾疏鐘

陳柏一首

柏字子堅泗陽州人嘉靖庚戌進士授兵部主事歷郎中出為山西副使有見南江閣詩選九卷文選十卷借山亭前集詩六卷續集六卷來青軒詩選四卷文選八卷退樂軒詩選一卷

四庫總目柏詩頗宕逸有姿而失於薄弱田按子堅子玉叔與七子游倡和極多子堅晚始為

詩亦與七子通聲氣人比之高十五子堅有句云何人曾似高常侍五十工詩亦善鳴紀其事也

送韓生歸吳興兼呈陳陸二丈

憐汝何落魄栖栖空遠遊秋風吹榭葉遙上九江舟山連西塞蒼溪水歸去鱖魚肥且美陳琳豪興筆若椽陸機藻思才如綺相逢儻問漢陰夫為言憔悴今若此

翁夢鯉一首

夢鯉字希登莆田人嘉靖庚戌進士除知縣徵授戶

部主事謫潮州通判遷惠州同知擢廣東僉事有戶

部使吳謫居等集

蘭陔詩話雨川詩情清婉五律擅場

早春麻城界河

客行初入楚風日麗長亭野草生荒岸沙禽浴晚汀溪流新雨活樹帶去年青轉憶西來道孤鴻雪裏聽

方攸躋一首

攸躋字君敬莆田人嘉靖庚戌進士除南戶部主事

進員外有草堂集陳岩集

懷吳明卿

一別河梁已隔旬征衣遙逐楚山塵平原渺渺愁孤客芳草萋萋憶故人鴻雁漸依彭蠡渚桃花擬泛武陵津才名汝亦吳興守何處汀洲採白蘋

黃謙一首

謙字亨大莆田人嘉靖庚戌進士官刑科給事中有

萬玉山藏彙十六卷

蘭陔詩話亭夫集中佳句如珠海南浮驚颶母蒼梧西去弔湘君亂後衣裘長作客愁中風雨再逢君玄菟名王修禹貢白羊守吏獵春田滄海總歸周白雉水軍盡立漢朱旗皆佳句也

雙淚秦庭事忍言南天不弔北來魂灘聲似解孤臣意日日奔流到海門

樂尙約 一首

尙約字孔源膠州人嘉靖庚戌進士除溧水知縣徵授江西道御史謫安州判官遷懷慶推官被論削籍有百一集

寄趙濬菴

聞道西石隱溪南日掩門里兒笑茅屋詩客問山村午夢春池草秋開夜月樽相思燕水闊東望一銷魂

王應時 一首

應時字懋行侯官人嘉靖庚戌進士歷官雲南按察使

留侯故城

野色餘衰柳荒城只故邱間關思附漢恬淡乞封留廢阪牛羊夕空碑草木秋采蘋聊一薦千里白雲愁

王汝述 一首

汝述字朝明金華人嘉靖庚戌進士除吉水知縣徵授刑部主事歷郎中出為貴州參議

貴陽道上

今朝縣雨歇昨夜布衾寒山色青堪染溪陰綠可餐

林大春

一首

大春字井丹潮陽人嘉靖庚戌進士歷官浙江副使
有井丹集十五卷

寄謝茂秦

梁苑多詞客漢家今幾人鄒陽久零落枚叔已風塵老去惟
君在書來憶我真聲名滿京洛何處覓垂綸

葉春及

一首

春及字化甫歸善人嘉靖壬子舉人授福清教諭遷
惠安知縣再遷賓州知州以病移文即歸削職為民

起興國知州未赴遷郎陽同知徵授戶部員外遷郎

中有石洞集十八卷

四庫總目

春及詩音節清亮

靜志居詩話網齋令惠安幾與姑臧萊蕪比潔解組
歸隱居羅浮之石洞雖以講學聞詩不墮程邵門戶

遊黃塘山庄

溽暑辭城市言從此地遊樹深芳徑曲花密石堂幽野蕨同
僧飯陰崖得句留分明絕塵想身外更何求

張鳴鳳

三首

鳴鳳字羽王臨桂人嘉靖壬子舉人除雷州司理改
黎平謫六安判官遷應天通判謫利州衛經歷改王
府官有萍浮東潛過江河垣謫台東漕粵臺等集

四庫總目桂勝十六卷桂故八卷張鳴鳳撰桂勝以山水標目各引證諸書敘述於前即以歷代詩文附本條下而於石刻題名之類搜采尤詳又隨事附以考證多所訂正後董斯張吳興備志朱彝尊日下舊聞即全倣其體例於地志之中最為典雅故分郡國官名先政先獻游寓雜誌在明代與記之中於康海武功志韓邦靖朝邑志外自為別調可以鼎立而三田按嘉靖王子舉人有兩張鳴鳳一江西豐城一廣西臨桂竹垞詩綜誤以羽王為豐城人四庫總目會煥江西詩徵因仍不改羽王博雅所作桂勝桂故為世所重其論明詩云蕩除積習北地汝南亡敢輕議正嘉之際黃岡王廷陳亮薛蕙清韻秀藻良為競爽後來其為高子業乎又云于鱗嶽挺雲端元美海涵天際子相儔而不深公實麗而不壯蓋靈算感逼則然所論不出七子窠臼語亦切當惟推崇吳明卿篤古中程首稱精雅於七子間不無所蔽其集今亦不甚流傳

白雀洞

白雀去已久深岩名不滅遙思千載人風素何高潔

夕陽洞

煙際度歸樵明滅不可辨返照射西崑潭光映東巘

灘江口田家

楂卧橫侵汲道崖傾半沒楓潭落日射魚磯上閒時種豆山

南

來知德一首

知德字矣鮮梁山人嘉靖王子舉人以薦授翰林待

詔有瞿唐日錄三十卷

田接待詔研精易理詩多蕭閒之趣

對酒

地幽春水淨花發夕陽遲白水盧仝宅青山謝眺詩羣鴉歸

已錄卷十
碧樹獨鶴下荒池無限江湖思留連到幾時

秋風

爲懶茶經熟因閒瑟譜工時清容蹇拙道在任窮通殘葉迎
霜赤寒花映日紅人生花葉共風至自西東

李尚實一首

尚實號子虛長治人嘉靖壬子舉人除輝縣知縣改
淇縣遷裕州知州有蕭然亭集

題暴尚書祠

尚書祠屋古城新小掇溪毛薦渚蘋左右何勞兵義士乾坤
故使有頑民直言晁氏能安漢錯把周官解誤人夜閣一龕
燈火寂青青廟木杜鵑春

